

Gavman bai katim Nesenel baset - P2

NCDC i go pas long bringim sevis - P4



pngelectionprinting.com



POSTERS BANNERS CARDS A-FRAMES FLYERS CAR STICKERS CORFLUTE SIGNS

# Skul TFF hevi, tasol Marianville Sekendari bai pas

Paul Zuvani i raitim

**MARIANVILLE** Sekenderi Skul long Nesenel Kapital Distrik bai pas sapos promis Edukesen Tusen Fi Fri (TFF) fan bilong dispela yia i no go long ol, skul Prinsipal Sr Angela Taylor, OLSH, i tok.

Sister Angela i mekim dispela tok taim skul i kisim tasol K380,000 na i wet yet long kisim narapela K770,000.

Mak bilong TFF mani we skul i mas kisim long wan wan yia em K1,250,000.

Tasol Sister Angela i tok skul i no kisim olgeta mani em i laikim na i no gat moa mani long ran i go moa long pinisim dispela skul yia.

Em i tok prais bilong ol samting long stua na ol sevis i go antap na Skul i nidim mani long stap.

Em i tok planti taim mak bilong TFF mani i go daunbilo long mak ol i askim long em.

Moa yet, mani i no save go kamap long taim.

Skul i gat 725 sumatin we 336 em ol boda na narapela em ol de sumatin.

Em i tok maski skul i no kisim olgeta TFF mani, em bin op i stap bikos long sapot em i kisim long ol gutpela ogenaesen na Alumina grup bilong skul.

Em i mekim dispela tok tu taim ol Gret 12 sumatin i sindaun long dispela wik long eksaminesen bilong ol.

Las wik ol Gret 10 sumatin bilong skul i sindaun long Eksaminesen bilong ol na i

greduet pinis.

"Mipela i no inap ranim skul sapos mipela i kisim mani daunbilo long mak mipela i laikim long em," Sr Angela i tok.

"Mak bilong mani mipela i nidim em K1 milien na go antap.

"Long ol yia i go pinis, mipela i bin save kisim mani daunbilo long mak mipela i save askim tasol dispela yia i nogut tru.

"Skul i narakain bikos i gat ol boda na de sumatin wantaim. Edukesen Dipatmen i no tok klia hamas mani wanpela sumatin i mas kisim."

Sr Angela i tok ol i nidim tu mani long mekim ol nupela haus tisa na ol klasrum. Nau yet sampela tisa i slip ausait na go tis.

Long sot bilong klasrum, 50 sumatin i stap long wanpela klasrum na dispela i winim mak bilong ol sumatin we kul i laikim long em, em 40.

Em i tok skul i laik mekim wanpela dupleks, wanpela infomesin teknoloji klasrum na sampela moa klasrum.

Em i tok i bin gat sampela ol haus na klasrum we wanpela kontrekta i mekim aninit long Edukesen RESI fan long 2013 tasol i no bin pinisim dispela ol haus. Bikos long longpela taim dispela ol haus na klasrum nau i go bagarap.

Tasol long pinisim gut skul long dispela yia em i askim long kisim olgeta TFF mani bilong skul.



Marianville Sekenderi Skul Gret 12 sumatin long Pot Mosbi i sindaun long eksaminesen bilong ol. Poto Nicky Bernard



Air Niugini announces flights to the **Federated States of Micronesia**

Commencing 3<sup>rd</sup> December, 2016. Connections available from Nadi, Honiara, Cairns, Brisbane, Sydney, Manila and Singapore.



**Air Niugini**  
www.airniugini.com.pg



For more information call



toll free on 180 3444

# Gavman bai katim Nesenel Baset i kam daun

**PRAIM Minista Peter O'Neill i tok Gavman bai katim i kam daun Nesenel Baset bilong yia 2017.**

Mista O'Neill i tok pastaim ol gavman i save apim mani mak long taim bilong Nesenel lleksen tasol nau bai no gat.

Mista O'Neill i tok Tresera Patrick Pruaitch na em yet i gat planti yia ekspirens long kamap iekonomik minista o minista bilong lukautim ikonomi na mani bilong kantri.

"Dispela ekspirens bilong mitupela bai helpim gavman long skelim gut ol samting we kantri bai nidim long neks yia.

"Mitupela i bin ranim kantri long gutpela taim na long taim nogut wantaim. Ol ekspirens bilong mitupela long ranim gavman bai helpim pipel na kantri long dispela taim.

"Mipela i save pinis olsem prais bilong ol komoditi o samting bilong salim na kisim mani i pundaun long intanesenel maket.

"Prais bilong oil na ges, gol na kopa, na arapela ol komoditi i pundaun long intanesenel maket. Dispela i mekim gavman i katim daun Nesenel Baset bilong neks yia," Mista O'Neill i tok.

Mista O'Neill i tok gavman i no

ken yusim taim bilong Nesenel lleksen olsem wanpela as long apim mani mak bilong Nesenel Baset i go antap.

"Ol manmeri bilong votim lida i gat tingting na ol i stap long makim gutpela lida. Mipela i mekim wok we pipel i givim pawa long mekim.

"Na dispela em long ranim gut kantri. Long mekim gutpela disisen long larim kantri i ran gut na pipel i amamas na stap gut.

"Sampela ol dipatmen na gavman ejensi bai kisim liklik mani, arapela bai kisim wankain mani mak ol i save kisim long wan wan yia.

"Tasol kain ol namba wan dipatmen olsem helt, edukesen, lo na oda sekta, na polis dipatmen i save mekim namba wan wok long kantri.

"Dispela em ol namba wan prairiti bilong gavman. Ol bai kisim inap fanding yet long larim ol i mekim yet gutpela wok ol i mekim," Mista O'Neill i tok.

Nesenel Baset bilong las yia i bin K14 bilien. Long yia 2015, kantri i bin kamapim K16 bilien Nesenel Baset na dispela em i bikpela mani plen kantri bin putim.

Treseri Seketeri Dairi Vele i tok Nesenel Baset bilong neks yia we

bai kamap long Novemba sindaun bilong Nesenel Palamen bai no inap kisim PNG LNG mani.

"Mani bilong PNG LNG i no kam insait yet long kantri. Baset bilong neks yia bai no inap kisim mani bilong LNG, tasol man i kam long ol arapela samting olsem takis mani we gavman i save kisim," Mista Vele i tok. Em i tok LNG mani bai kam insait long kantri long yia 2020.

Ol save man bilong ikonomi i tok sapos kantri i bin kisim LNG mani, mani mak bilong Nesenel Baset bilong neks yia bai bikpela moa tru.

## O'Neill askim Pope Francis long kam

PRIM Minista Peter O'Neill i askim het bilong Katolik Sios, Pope Francis, long kam lukluk raun long PNG.

Mista O'Neill i mekim dispela toktok taim em i amamas long Pope Francis i luksave long Asbisop bilong Pot Mosbi, John Ribat, na mekim em i kamap nupela Kardinel bilong Katolik Sios long PNG.

Pope Francis i makim Asbisop John Ribat bilong Pot Mosbi i kamap Kardinel bilong Katolik Sios long PNG Sande Oktoba 9.

Long dispela taim long Vatican, Pope Francis i makim arapela 17 man tu i kamap Kardinel. Dispela i bringim namba bilong ol Kardinel long wol i go antap long 120.

Praim Minista O'Neill i tok gavman i amamas long dispela luksave Vatican i givim long PNG, na em i askim Pope Francis long kam lukluk raun long PNG na strongim pasin bilong kamapim poroman namel long PNG na ol Katolik Sios.

"Taim Pope Francis i makim wanpela man PNG i kamap Kardinel bilong Katolik Sios, dispela i mekim kantri i amamas long Pope i givim luksave

long yumi.

"Mi laik askim Pope Francis long kam raun long PNG na lukim ol wok Katolik Sios i mekim long kantri.

"Mi askim Apostolik Nuncio long salim tok tenkyu bilong pipel na gavman bilong PNG i go long Pope Francis long luksave long PNG na givim dispela bikpela wok long man PNG, Asbisop John Ribat," Mista O'Neill i tok.

Apostolik Nuncio bilong PNG na Solomon Ailan, Asbisop His Grace, Kurian Mathew Vayalunkal, i bin tokim Praim Minista O'Neill olsem Pope Francis i makim Asbisop John Ribat bikos em i luksave long bikpela wok Katolik Sios i mekim long PNG.

Asbisop HG Kurian Mathew Vayalunkal na Kardinel John Ribat wantaim i bin go lukim Praim Minista O'Neill long las wik Fonde bihain long nius i kam long Vatican long Sande olsem Asbisop John Ribat i kamap namba wan Kardinel long PNG.

Namel long arapela 17 asbisop long arapela hap long wol, Pope i makim Asbisop bilong Pot Mosbi, John Ribat, i kamap namba sikis (6) Kadinel insait long Pasifik rijon.

Insait long Osenia o Pasifik rijon, Australia i gat tupela Kardinel, Nu Silan i gat tupela na Tonga i gat wanpela Kardinel.

Asbisop John Ribat nau i kamap namba sikis Kardinel long Osenia.

Dispela i bringim namba bilong ol Kadinal long wol o go antap long 120. Ol Kadinal i save makim Pope sapos Pope i lusim sia o i dai.

Mista O'Neill i tok gavman bai stretim toktok wantaim Apostolik Nuncio long stretim o mekim plen bilong larim Pope Francis i kam lukluk raun long PNG.

Apostolik Nuncio i makim maus bilong Vatican na Pope long PNG. Em i wankain olsem Ambeseda bilong Vatican na Pope i kam long PNG.

"Mipela bai stretim toktok na stretim arapela ol samting wantaim Apostolik Nuncio. Pope John Paul II i bin kam raun long PNG tupela taim na mipela i amamas long strongim poroman namel long PNG na Vatican.

"Ol manmeri PNG i wanbel long lukim Pope Francis i kam raun long PNG, na skelim ol wok Katolik Sios i mekim long komyniti na kantri bilong yumi," Mista O'Neill i tok.

## Awesa baim skul fi bilong sumatin

OL sumatin bilong Imbonggu distrik long Sauten Hailans husat i skul long yunivesiti, koles na teknikel skul bai kisim helpim long wanpela nupela edukesen subsidi skim.

Memba bilong Imbonggu, Francis Awesa, i tok neks yia Imbonggu Distrik Developmen Atoriti bai apim mani mak bilong dispela skim i go antap long K3 milien.

Long las wik Fraide, Mista Awesa i baim

K123, 000 long Yunivesiti ov PNG (UPNG) long helpim ol sumatin bilong Imbonggu i baim skul fi.

Total namba bilong ol sumatin bilong Imbonggu husat bai kisim helpim aninit long dispela edukesen subsidi skim em 1, 084 sumatin husat i skul long ol yunivesiti na koles long PNG na ovasis wantaim.

"Ol sumatin bai kisim K1, 229, 000 aninit long dispela helpim. Dispela mani

bai helpim 1, 084 sumatin," Mista Awesa i tok.

Mista Awesa, husat i Minista bilong Woks, i tok ol sumatin bilong narapela ol yunivesiti bai kisim mani bilong ol bihain long dispela wik.

"Mipela i amamas long Tuisen Fi Fri (TFF) edukesen polisi bilong Gavman. Dispela polisi i helpim planti papamama na sumatin.

"Long Imbonggu, mi wok long putim

edukesen i go pas. Distrik bilong yumi i no gat wapela maining o oil na ges rojek.

"Yumi no gat wanpela ti, kopi o kopra plantesin. Edukesen tasol em i laip bilong yumi. Bihain taim bilong ol pikinini bilong yumi stap long edukesen tasol.

"Mi laikim ol sumatin long yusim dispela sans long skul gut na stap gut olsem gutpela man na meri long bihain taim," Mista Awesa i tok.

## Mangape: Mi tok nogat long braiberi mani

MEMBA bilong Porgera-Lagaip, Nixon Mangape, i tokim ol manmeri long Wabag, Enga Provins long las wik Fraide olsem em i les long kisim wanpela braiberi mani gavman i laik givim em.

Mista Managpe i tokim moa long 10, 000 manmeri Enga olsem em i putim intres o laik na tingting bilong ol pipel i go pas na em i tok nogat long kisim K5 milien Gavman i laik givim em long go joinim kemp bilong ol long Alotau.

Taim Suprim Kot i bin tokim Spika bilong Palamen long larim Vot i No Gat Bilip egensim Praim Minista Peter O'Neill i kamap long mun Julai

long dispela yia, Mista Mangape i tok Gavman i bin laik givim em K5 milien na kisim em i go long kemp bilong ol long Alotau na joinim gavman.

"Sampela man i laikim mi lusim Oposisen na ol i laik givim mi K5 milien," em i tok.

Em i tok em i joinim Oposisen long pait egensim pasin korapsen na soim gutpela lidasip na em i tok nogat long kisim dispela bikpela mani.

"Mi soim kela bilong mi na tok mi save long mani. Kela long het bilong mi ya mani mekim na em i kamap kela," em i tokim ol manmeri long Wabag.

Mista Mangape i tok ol 21 memba i

stap long Oposisen em ol trupela lida bilong putim intres bilong manmeri go pas.

"Mipela i laikim PNG i gat gutpela lidasip. Mipela i laik pait egensim pasin korapsen. k.

Wanpela mausman bilong Praim Minista i tok ol i no save long dispela stori we Mista Mangape i tok long en.

Em i tok PNC Pati no bin tingting long givim wanpela mani long Mista Mangape, na dispela toktok bilong em, i giaman toktok long pilai politik bikos ileksen taim i kam klostu.

"Praim Minista em i bikpela lida bilong dispela kantri. Mipela i

no save givim o kisim braiberi mani. PNC Pati tu i bin gat bikpela namba long dispela taim na mipela i no bin nidim wanpela memba long Oposisen long kam joinim Gavman.

"Ol pipel i wanbel long Praim Minista O'Neill i mekim wok. Gutpela wok tru em i mekim long kirapim kantri, na kantri bilong yumi i senis insait long 4-pela yia tasol.

"Ol memba na minista i lukim dispela gutpela sevis na developmen Praim Minista wantaim Gavman i mekim, na ol i stap baksait long O'Neill," em i tok.

**Meadow Fresh**  
Hurry 2 days till entries close!

**JINGLE COMPETITION**  
**Win K20,000**  
worth of Music & Sporting equipment for your school

Get together with your school mates and write a 30 second Meadow Fresh jingle.

Email entries to meadowfresh@gfpng.com or mail to PO Box 673, Port Moresby Papua New Guinea.

Goodman Fielder

New Zealand pure milk full cream  
New Zealand Strawberry  
New Zealand Choco Choc

**Polye amamas long Asbisop John Ribat kamap Kardinel**

OPOSISEN Lida Don Polye i wanbel na amamas long Pope Francis i luksave long PNG na makim wanpela man PNG i kamap namba wan Kardinel long kantri.

Mista Polye i bin amamas taim Asbisop John Ribat bilong Pot Mosbi i kamap namba wan man long PNG i kamap Kardinel na namba siks man insait long Pasifik riji long kamap Kardinel bilong Katolik Sios.

"Pope Francis i luksave long kantri bilong yumi na dispela em i wanpela gutnius we yumi olgeta i mas amamas long en.

"Em i no samting bilong ol Sios lain tasol long amamas, kantri mas amamas tu dispela nupela wok Pope i givim long Asbisop John Ribat," Mista Polye i tok.

Mista Polye i tok tenkyu long ol famili bilong Asbisop John Ribat na Katolik Sios long bikpela sapot ol i givim long helpim em i mekim wok bilong em olsem wanpela Sios lida insait long kantri.

Mista Polye i tok ol papa bilong dispela



OPOSISEN Lida Don Polye

kantri olsem Sir Michael Somare na arapela ol lida i bin putim Tok bilong God i go pas na kamapim PNG olsem wanpela Kristen kantri.

"Wanem samting ol papa bilong kantri i bin mekim long larim PNG i kamap Kristen kantri in au karim kaikai, na kantri bai lukim planti gutpela samting i kamap," Mista Polye i tok.

Mista Polye i tok dispela luksave PNG i kisim em i gutpela tru bilong ol Sios insait long kantri bikos PNG nau i wok long salim ol misineri manmeri i go aut long ol narapela kantri we Tok bi-

long God i no go insait long en.

"Dispela nupela wok bilong Kardinel John Ribat i nidim sapot bilong gavman na olgeta Sios insait long kantri. Yumi mas sapotim wok bilong Katolik Sios long skruim Tok bilong God i go moa long arapela ples we ol mameri i no save long gutnius," Mista Polye i tok.

Mista Polye i tok ol Sios insait long kantri i save sapotim Gavman long givim edukesen na helt sevis long ol manmeri na em i tok tenkyu long dispela gutpela wol ol i wok long mekim.

# Basil: PNG no nidim moagan long ileksen taim

**PNG Kastoms i mas luksave na givim tok orait long larim olgeta bikpela samting bilong kamapim birua long laip bilong manmeri long i kam insait long kantri, Deputi Oposisen Lida Sam Basil i tok.**

Mista Basil i mekim dispela toktok bihain long PNG Kastoms i kamautim wanpela ripot olsem ol i bin kisim sampela bikpela gan long sip bris long Pot Mosbi.

Mista Basil i tok olgeta samting long kamapim birua long laip bilong manmeri olsem gan, ol kemikel na ol samting bilong gan we polis o ami i laik yusim, i mas kam ausait bihain long PNG Kastoms i sekim na givim tok orait.

Mista Basil, husat i lida bilong Pangu Pati, i mekim dispela toktok bikos ripot i bin kamaut ples klia olsem PNG Kastoms i no bin tok aut long wanpela kago we dispela i gat ol bikpela gan we ol ami save yusim.

Sif Seketeri bilong Gavman, Isaac Lupari, i tok dispela gan em i gan bilong polis.

Tasol Mista Basil i no bilip long dispela toktok bilong Mista Lupari, husat i siaman bilong Nesenel



Deputi Oposisen Lida Sam Basil

Sekyuriti Edvaisori Komiti (NSAC).

Mista Lupari i tok sampela ol wok manmeri bilong gavman husat inap long stopim pasin korapsen long kastoms na intanesenel sekuriti i wok long larim sampela forena o ol man bilong narapela kantri i kam insait wantaim ol samting bilong ol we lo i tok tambu long en.

"Ol opisa bilong PNG Kastoms i larim drak na arapela samting i kam insait long kantri. Sampela ol kaikai na ol samting we ol i mekim ol narapela kantri tasol lo i tok tambu long kam insait long kantri i wok long kam insait yet," Mista Lupari i tok.

Em i tok ol manmeri

PNG yet wok long helpim ol forena long kisim ol samting olsem gan na arapela prodak i kam insait long kantri na ol dispela samting i save abrusim takis.

Mista Lupari i tok dispela gan we Mista Basil i toktok long en, em i nupela saplai bilong polis

manmeri.

Em i tok no gat wanpela samting em i rong long dispela bikos ol polis na ami i save kisim nupela gan na dispela saplai em bilong yusim long ileksen sekuriti.

Tasol Mista Basil i tok toktok bilong Mista Lupari i no go stret na em i bilip olsem sampela samting i rong.

Wantok Niuspepa i bin salim imel i go long opis bilong Polis Komisina Gari Baki na Kastoms Komisina Ray Paul long Mande long dispela wik tasol i no gat wanpela bekim i kamap long tupela man.

Mista Basil i tok taim praiwet kampani, gavman ejensi o manmeri i no tok

uat long PNG Kastoms olsem bai kisim ol samting olsem gan o arapela samting long kamapim birua, dispela kain pasin bai brukim lo bilong Kastoms Ekt.

"Mi prèt olsem polis i brukim lo pinis sapos dispela ol gan i tru tru bilong ol bikos ol i no tokaut long Kastoms Opis," Mista Basil i tok.

Em i tok em i wok long tingting planti taim em i harim stori bilong dispela gan bikos Nesenel Ilekseen bai kamap klostu taim tasol na no gut ol sampela man i laik yusim long taim bilong ileksen na kisim i kam insait long kantri.

"No gut gavman i giaman na tok dispela ol gan em i bilong ami na polis taim mipela i painimaut pinis na save long em.

"Sapos gavman i giaman yumi, ating dispela gan em i kam long nem bilong sampela ol memba na lida bilong yumi, husat i laik yusim dispela ol gan long winim ileksen neks yia.

"Dispela kain pasin bilong kisim gan i kam insait long kantri mas stop, na ol wok manmeri bilong Kastoms mas mekim wok stret," Mista Basil i tok.

## Hayapuga LLG nidim wanpela haiskul

WANPELA lida man long Idauwi ples long Hayapuga LLG long Tari i laikim Hela Provinsal Gavman na na Edukesen Dipatmen long kirapim wanpela nupela haiskul.

Katekis bilong St John's Parish long Idauwi, Thomas Ikiye, i tok ol manmeri long Idauwi i laikim wanpela haiskul i mas kamap long ples bilong ol bikos ol i gat inap

praimeri skul long fitim ol gret 9 sumatin long haiskul.

Mista Ikiye i tok planti taim ol sumatin bilong Idauwi praimeri skul na St John's Tukupawi praimeri skul i save kisim gutpela mak tasol ol haiskul long Hoiebia, Maragarima, Tari na Koroba i no save gat inap spes long kisim ol.

Em i tok insait long Hayapuga

LLG tasol ol i gat 5-pela praimeri skul na insait long wanpela yia tasol dispela ol praimeri skul i save skulim moa long 200 gret 8 sumatin.

"Prameri skul yumi gat long Hayapuga em i planti tumas. Planti ol sumatin i pinisim gret 8 na ol i stap nating. Mipela i nidim wanpela haiskul long larim ol dispela

sumatin husat i pinisim gret 8 i go insait long haiskul na mekim gret 9," em i tok.

Mista Ikiye, husat i siaman bilong St John's Tukupawi praimeri skul, i singautim Fainens Minista na memba bilong Tari-Pori, James Marape, long putim wanpela nupela haiskul long Hayapuga LLG.



Katekis bilong St John's Parish long Idauwi, Thomas Ikiye



**BANK WHERE YOU ARE**

A BSP Agent provides you access to basic banking services anywhere in PNG.

**Do your banking where you are!**



# NCDC i go pas long bringim sevis

**PABLIK Sevis Minista Puka Temu i wok long painim ol lokal ogenaiesen husat wok bilong ol i soim 10-pela step moa i go pas long ol narapela ogenaiesen long wokim ol Smat Gavman, na em i tok NCDC em i wanpela dispela kain ogenaiesen.**

“Mi bilip olsem dispela ogenaiesen inap long kalap i go longwe insait long 21 sensueri long senisim tingting bilong ol sivel sevan, long ol nupela kain teknoloji, long mekim gutpela wok olsem ol sivel sevan,” Minista Temu i tok.

Em i bin kamap olsem ges spika long taim bilong Komisen i mekim luksave long ol longpela taim wokman na wokmeri long Airways Hotel i no longtaim i go pinis.

Minista Temu i salensim olgeta lain wantaim Siti Menesa Leslie Alu, ol 4-pela Deputi Siti Menesa, ol senia menesa na ol wok-



**Pablik Sevis Minista tok amamas long Siti Menesa Leslie Alu long 30 yia sevis long Komisen wantaim Misis Daure Alu long hankais.**

**Pablik Sevis Minista, Sir Puka Temu tok amamas long man we i mekim wok longpela taim aninit long Nesenel Kepital Distrik Komisen, Patrick Ali long Airways Hotel long Trinde 6 Oktoba.**

man na wokmeri bilong NCDC i bin stap long harim dispela tok salens long karim ogenaiesen i go fowod long narapela level olsem Kepitel Siti.

Em i tokim olgeta lain long wok hat long apim wok mak bilong ol long

kamapim Pot Mosbi olsem namba wan siti long rijon.

“Mi bilip olsem ogenaiesen bilong yupela, aninit long ol politikel lida bilong tude, na i gat smat menesmen tim bikos yupela i tingting long stat olsem wanpela ogenaiesen long

tok tenkyu long ol lain i wok longpela taim long smatpela we.

“Olsem na yumi mas luksave olsem kepitai siti em i impoten tru olsem siti bilong ol pipel, ol save bilong wok ol i gat em i impoten long kepitai long wanpela ogenaiesen na yumi mas banisim dispela kepitai,” Sir Puka i tok.

“Mi ting olsem menesmen i luksave long ol dispela ol liklik pipel bikos yumi mas stat long ol olsem wanpela nesen. Yumi mas tok, tenkyu sir, tenkyu madam. Yumi mas givim luksave long we hap em i mas kamap!”

Minista Temu i tok em i tok-



tok wantaim Seketeri John Kali long bihainim tingting bilong NCDC na em i laik lukim ol narapela dipatmen het tu long wokim wankain.

“Olgeta taim mi save toktok long Seketeri John Kali olsem yumi mas bihainim wei bilong NCDC, yumi mas bihainim pasin bilong Leslie Alu na tim bilong em husat i redim dispela taim long makim 46 wokman na wokmeri bilong ol na husat i bin givim moa long 1000 aua bilong ol long sevim dispela nesen,” em i tok.

Long makim maus bilong O’Neill-Dion Gavman, Minista Temu i tok amamas long 46

lain husat i kisim longpela taim sevis luksave long sevis ol i givim long long komisen.

Wanpela bilong ol em Siti Menesa, Leslie Alu husat i bin wok long komisen inap 30 yia.

Man husat i bin wok longpela taim tru wantaim 37 yia em Patrick Ali, Kodineta bilong Plent na Transpot, Ensinia Dipatmen.

Minista Temu i tok dipatmen bilong em i laik mekim luksave long sampela bilong ol long kisim Logohu awot na ol awot bilong Kwin na em i tokim Human Risos Dipatmen long givim nem lista long em bihain.



## URGENTLY REQUIRED

**Free lance Advertising Sales Representative to sell Space Advertising and Bulk Subscription of Wantokniuspepa to government departments, Business houses, churches, schools & institutions, NGOs and interest individuals in their respective Provinces.**

Are you retired, out of work or looking for something to do, this will be an ideal opportunity .

Attractive incentive is available to people who are willing to help themselves at their own time.

**Qualifications;**

- Pervious experience in selling advertising space or related industry but not necessary
- Living in provincial towns with own accommodation
- Own car
- Contactable mobile phone/Emails etc

If you meet the above criteria please send your expression of interest in the first instances to:

**The Sales and Marketing Manager, Word Publishing Company Limited. P.O.Box 1982, BOROKO NCD. Ph: 3252500, Mobile Ph. 79187688 or email advertising@wantokniuspepa.com lbents@wantokniuspepa.com**

Applications Close 4th of November 2016.

## Ol Lutheran meri i toktok long gutpela sindaun

**Nick Malaka i raitim**

“KIRAP na yumi wokim gen Jerusalem, God bai helpim yumi” (Nehemiah.2:17) i hetok bilong namba 15 ELC PNG Lutheran sios Nesenel Meri Konprens i bin kamap long Muiana Sekenderi skul long Is Simbu.

Ol i sanapim dispela hetok i bihainim luksave bilong ol meri long ol hevi i kamap namel long ol famili, sios na gavmen.

Reveren Yasam Aiwara i toktok long Genda na Vailens, na em i tok, wanem kain pikinini kaikai man i planim, dispela kain kaikai tasol bai dispela man i kisim,(Galesia.6:7).

“Sindaun bilong ol famili i bagarap long

wanem, papa o mama i mekim rong disisen, olsem na hevi i bungim olgeta famili, papa, mama na ol pikinini tu. Olgeta pasin pikinini i mekim em i lainim long papa na mama,” Reveren Yasam i bin tok.

Konsalten bilong Famili PNG Ogenaiesen, Watson Gabana, i bin mekim awenes bilong ogenaiesen na em i toktok long seksual vailens na ol hevi i save kamap long haus taim papa na mama i no slip wantaim.

Em i kaunselim planti man na meri, na em i luksave long ol as bilong famili i bruk, na papa i lus tingting long mama, na ol pikinini i kisim hevi bikos long dispela as tingting.

Wanpela deleet meri i bin askim sapos gavman i wokim awenes long pasin bilong yusim kondom o karamap, bikos dispela i mekim pasin pamuk i go bikipela tru. Na sios i gat wanem tok long dispela?

Reveren Yasam i tok planti manmeri nau i save askim gavmen na ol politisen long kisim fri mani, na dispela em i as bilong les pasin na painim isi laip, na olsem tu, ol meri i mekim pasin pamuk long kisim mani na lukautim ol pikinini taim papa i lusim ol wantaim mama tasol.

Dispela em i wanpela vailens long famili na em i stat long bagarap bilong laip.

Ol Lutheran meri nau i toktok planti

long pasin bilong lainim ol arapela long pasin bilong kamapim gutpela sindaun na lukautim ol yet.

Dispela em long pasin bilong kamap independen na stap independen.

“Sapos yu lainim wanpela man long pasin bilong kisim samting na yu no lainim em long pasin bilong kamapim samting, stap em yet na lukautim em yet, olgeta taim em bai kam long yu na askim yu long ol samting ol taim.

“ Olsem na i gutpela moa sapos sios i lainim ol manmeri bilong en long pasin bilong stap independen na noken stap long ol arapela na sios na gavman oltaim.” Pasto Aiwara i tok.

# ACIAR na CCI ranim kakao fama woksop

# Mekim samting na i no toktok tasol

**Tony Sapan i raitim**

SENTA bilong Australia long Intenesenel Egrikalsa Risets (ACIAR) wantaim Kakao na Kokonas Institut insait long Nu Ailan provins i bin ranim namba wan trening bilong ol model kakao fama insait long provins. Dispela program em i 5-pela yia projek i bin stat

long 2016 inap long 2020 na i karamapim 4-pela provins bilong kantri. Em long Is Sepik, Madang, Simbu na Nu Ailan.

Dispela projek ol i kolim long Entaprais Driven Transformesen Famili Kakao Prodaksen ol i kari-maut insait long ol dispela provins.

Ol fama bai i lainim ol wei bilong wok insait long

kakao bisnis stat long neri i go long salim kakao.

Bos bilong CCI insait long Nu Ailan, Kula Dalogo, i tok ol fama we i kamap long trening bai i kisim wok bilong ol didiman opisa insait long komuniti bilong ol.

Ol 20 Kakao fama i kam long olgeta hap bilong provins i bin stap long dispela trening woksop.

**Tony Sapan i raitim**

**GAVANA bilong Nu Ailan, Sir Julius Chan i tok, gavman na pipel bilong provins i gat bikpela tingting long ranim gut provins ol i no toktok tasol, ol i mekim samting.**

Dispela em as tingting bilong em na ol i mekim samting long gat moa pawa long lukautim ol yet.

Long las mun, Nu Ailan Provinsal Asembli (NIPA) i mekim bikpela tingting long gat moa pawa long mekim wok bilong ol.

Ol i tok save pinis long Nesenel Gavman olsem ol i laikim moa pawa long mekim ol disisen bilong ol yet, long kisim moa helpim long ol risos i kam long provins bilong ol na long go pas na lukautim ol polisi na program ol i lukim olsem ol

namba wan long winim tingting na laik bilong ol.

Nupela Provinsal Helt Atoriti i tokaut long en long las mun i wanpela long ol dispela program.

Na bikos Nu Ailan nau i gat moa pawa long lukautim em yet, Sir Julius i tok em i ting gupela nem bilong dispela nupela lain em Nu Ailan Provinsal Helt Atoriti

## Ol Katolik meri i no save long mama lo bilong ol

**Tony Sapan i raitim**

PLANTI Katolik meri insait long Kavieng Daiosis i no save long mama lo bilong ol, maski lo i stap klostu olsem 20 krismas pinis bihain long Bisop bilong Kavieng Daiosis, Ambrose Kipapensi i bin oraitim long yia 1997. Dispela i bin kamap klia tru long

miting bilong ol Katolik meri bilong 4-pela long 7-pela peris insait long NTI Dineri ol i bin bung long Milmila peris long Duk Ov Yok Ailan i no long taim i go pinis.

Bikos planti long ol i no save long dispela mama lo bilong ol, planti long ol i bin autim ol tingting long mekim ol tok

klia long en bipo long bung bilong ol long Lihir long makim ol nupela lida.

Ol go pas lain bilong Dineri nau em long Presiden, Seketari na Tresera i kam long Sen Clement peris. Ol bai wokim ileksen long 6-pela peris insait long NTI Dineri long makim presiden, seketeri na tresera.

## DOY ring rot ileksen stori

**Tony Sapan i raitim**

TOKTOK long Duke ov Yok (DOY) Ailan ring rot we ol i save toktok tumas long en long ol ileksen taim i kamap long en gen.

Ol i ting wok bai i stat long bipo long stat bilong 2017 Nesenel Ileksen.

Sapos wok i kamap long en bipo o long taim bilong dispela ileksen i kam, bai ol pipel long ailan i lukim olsem dispel projek i bilong baim vot

bikos em i no namba wan taim ol i toktok long en na ating bai i no las taim.

Dispela 62 kilomita rot bai i ran i go olsem long bikples DOY. Ol i makim pinis K300,000 bilong wok long en na sampela masin bilong wok i stap pinis long ailan, tasol i no klia wanem taim bai wok i stat.

Wanpela long ol DOY LLG Wod memba em ol pipel bilong en i lukluk i go pas long dispela rot ol

i wokim long ailan em John Ken.

Em i memba bilong Wod 20 we i karamapim Rakanda/Ralama na i gat moa long 800 pipel long en.

Taim em i toktok long wanpela bung bilong ol Katolik mama insait long Namatanai dineri long mun Ogas long dispela yia, Mista Ken i tok em i laik bai ol i wokim dispela rot long helpim ol pipel long ailan i wokabaut i go

i kam taim ol mekim ol wok bilong ol, na long kisim sevis long en.

Tingting long kisim toktok bilong DOY LLG Presiden, Henry Liba, husat i no save stap long ailan long toktok long wok long dispela rot i no bin gutpela.

Mista Liba i bin wokabaut wantaim Is Nu Briten Gavana, Ereman Tobaining Junior i go long Butlivan Wod taim mipela i bin traim long toktok wantaim long en.



**RAMU NIKEL MAIN EM MIPELA YAI** OL Len Ona bilong Ramu Nikel i kam long wanpela bikpela bung long Pot Mosbi namel long ol na ol projek lain. Dispela bung em long autim tingting bilong ol long wok kamap bilong Ramu Nikel na wanem kaikai bai ol ken kisim. *Poto Nicky Bernard*



### Apostolik Nuncio i mekim raun...

Nupela mausman bilong Pope long PNG na Solomon Ailan, Apostolik Nuncio Kurian Mathew Vayalunkal i mekim opisal lukluk raun bilong em i go long Holi Spirit Mesa Semineri bilong Papua Niugini na Solomon Ailans long Bomana ausait long Pot Mosbi, long 9 Oktoba, 2016, olsem ol poto ya i soim.

Papal Nuncio i bin bungim ol seminerien na ol tisa bilong Holi Spirit Semineri.

*Ol poto: Pater Lawrence Arockiaraj, Vais Rekta bilong Holi Spirit Semineri.*



## Sir Julius amamas long namba wan kardinel bilong PNG

### Ahimsa Kibikibi i raitim

PASTAIM praim minista na gavana bilong Nu Ailan, Sir Julius Chan i joinim ol narapla lida insait long wol long tok welkam long toksave i kam long Rom long ol nupela kar-

dinel bilong lotu Katolik insait long 16 pela kantri.

Sir J i tok makim bilong Sir John Ribat, Asbisop bilong Pot Morsbi, olsem nambawan kardinel em bikpela samting tru insait long wan handet yia wokabaut bilong


lotu Katolik insait long kantri na pasifik tu.

"Mi lukim dispela olsem gutpela sain, Lotu Katolik i gro i go strong na Sir John i mekim gutpela wok long apim wok lotu, we i mekim luksave long gro bilong lotu," Sir J i tok.

Em i tok long namba wan taim lotu i kamap long 1882, lotu katholic i bin strong tru na i go pas long kisim developmen i go insait long kantri long ol samting olsem skul, haus sik na ol narapela helpim olsem.

Sir Julius i tok PNG i luksave long wok bilong ol sios na long Nu Ailan, ol i kamap patna na wok bung wantaim aninit long sios patnasip program long sapotim wok lotu insait long provins.

## PNG LNG TOKTOK



Halo olgeta. Taim mi lukluk i go long kamapim moa bisnis bilong ExxonMobil long PNG, mi wok long tingting i go bek long ol dairek na indaurek sans PNG LNG i gat na i wok long kamapim yet long dispela kantri.

PNG LNG em i gat moa samting long baksait bilong em na ino bilong developim ol gas resource tasol. PNG LNG em tu i bilong kamapim moa developmen long ol pipol na save bilong ol, na long kamapim na karim ol gutpela samting long ol lokal komyuniti i ken i gat i go longpela taim bihain.

Olgeta gutpela wok bilong mipela i kam inap nau bai i no inap long kamap sapos ol wokman na wokmeri bilong mipela i no gat komitmen na i no givim ol yet long wokim bisnis bilong mipela. Mipela i amamas olsem 2400 bilong ol wokman na wokmeri bilong mipela em i 82 pesen bilong bilong olgeta wokmanmeri i bilong Papua Niugini stret. Wantaim ol trening progrem na wok experiens ol i kisim, ol i wok long kisim moa save na teknikal skil long holim ol

kain wok long longpela taim bihain insait long oil na ges indastri. Ol i ken wokim ol dispela ol kainkain wok insait long ol wok eria olsem; ensinia, oprensens, mentenens, sefti, helt na envairomen, na i go long fainens, kontrol na pablik na gavman afes tu.

Kamapim na strongim moa bisnis bilong ol lokal kampani, em i wanpela bikpela rot long developim save o kepesiti bilong ol lokal pipol. Stat long taim Projek i bin kirap, we mipela i bin givim moa long K12 bilien long ol sevis we ol Papua Niugini kampani i bin givim, planti bilong ol we mipela i bin helpim long kirapim. Long dispela K12 billien, moa long K3 bilien i bin go long ol lenona o papagraun kampani. Wantaim sapot bilong mipela long IBBM Enterprais Senta mipela i wok long givim ol trening long ol lokal bisnis long kamap bikpela na kamap strong. Komyuniti developmen em i narapela fokus eria bilong mipela. Ol komyuniti wok bilong mipela i save lukluk long strongim kepesiti o save insait long ol eria bilong: edukesen, helt, envairomen menesmen na wimen ikonmik empawamen.

Mipela i putim moa long K780 milien i go long wok bilong infrastraksa, ol sosel wok na long givim moa save long tingting na long wok. Mipela i wok long lukim yet planti gutpela samting long kepesiti bilding long komyuniti na lukim ol dispela komyuniti i kamapim save



Sentral Provinsel Gavman Deputi Administrata Edward Kila, PNG LNG Plent Menesa Murray Bell na Esmie Sinapa bilong Esmie Sinapa Developmen Konsaltens na Sevises wantaim Bod of Menesmen Training Manuel long taim bilong lons.

long lukautim ol yet. Na tu long ol dispela komyuniti i ken serim ol save na gutpela wok i kamap long em wantaim ol narapela.

I no longtaim i go pinis mipela i bin tokaut long sapot bilong mipela long PNG Tisa Ekselens Awot, em i hap bilong Praim Minista Ekselens Awot progrem we Dipatmen bilong Edukesen i go pas long en, long luksave na givim ona long wanem samting ol tisa i mekim long dispela kantri.

Sapot bilong mipela long 4-pela nupela tisa haus long ol skul i stap klostu long LNG Plent na patnasip bilong mipela wantaim Sentral Provinsal Gavman, Esmie Sinapa Developmen Konsalten na ol LNG Plent praimer skul, long kamapim wanpela impoten trening manuel long helpim long kamapim

gutpela lidasip na gavanens kwaliti bilong ol skul Bod ov Menesmen, em i stap tu antap long bilip bilong mipela olsem ol tisa husat i gat gutpela sapot bai wokim nambawan wok long kamapim ol gutpela lida bilong bihain taim na long sapotim ikonimi i kamap stron.

Mi pilim amamas olsem mi bilong wanpela ogenaisesen we i wok hat long holim na kamapim moa bisnis bilong mipela long planti yia bai i kam bihain yet, na long kontribusen bilong mipela i go long developmen bilong dispela kantri.

Andrew Barry  
Menesing Dairekta  
www.pnglng.com

# Marianville redi long eksaminesen

Paul Zuvani i raitim

MARIANVILLE Sekendari Skul ausait long Pot Mosbi i redim gut ol Gret 10 na Gret 12 sumatin bilong em i sindaun long ol eksaminesen, skul prinsipal Sr Angela Taylor, OLSH, i tok.

Em i tok taim ol Gret 12 sumatin i sindaun long eksaminesen bilong ol long dispela wik. Las wik ol Gret 10 sumatin i pinisim eksaminesen bilong ol na i greduet pinis.

Skul i gat 123 Gret 12 sumatin na 214 Gret 10 sumatin.

Sr Angela, husat i tis long skul stat long 1992, i tok olgeta yia skul i laik kamapim gutpela mak olsem em i wok hat long redim ol sumatin bilong em,

Wantaim dispela skul i laik lukim ol sumatin i kisim gutpela save na i klia taim ol i sindaun long eksaminesen.

“Olgeta yia mipela i lukim ol Gret 10 bilong mipela i kisim ofa o wok taim ol i pinisim skul” Sr Angela i tok.

“Dispela i wankain long ol Gret 12 sumatin bilong mipela,” em i



Sr Angela Taylor, OLSH, wantaim ol sumatin bilong Marianville Sekendari Skul ausait long Pot Mosbi. Foto: Nicky Bernard

tok taim skul i stat kisim ol Gret 12 sumatin long 2003 i kam.

Long ol boda sumatin husat i save slip long skul em i tok maski i bin gat PNG Pawa blek aut ol

sumatin i bin kisim inap taim long inapim ol aua bilong stadi.

Kamap bilong Gret 12 i senis liklik we Edukesen Dipatmen i senisim wanpela wik bilong ek-

saminesen long wanpela wik i go long tupela wik.

Dispela wik ol i sindaun long Mets, Pisiks, Histori, Kemistri, Ikonomiks, Lenguis, Jiograpi.

Fi Fri mani long kamapim moa infrastraksa olsem ol haus tisa, ol haus slip bilong ol meri sumatin ol klasrum.

Narapela wik ol bai sindaun long Akaunting, Baioloji na Bisnis Stadis.

Long dispela yia Edukesen Dipatmen i kamapim tu lo stadi na dispela i go wantaim Histori.

Sr Angela i tok long dispela yia Skul i statim lo sabjek wantaim Gret 11 sumatin na narapela yia ol bai sindaun long Gret 12 eksaminesen.

Long mekim ol sumatin i lain gut em i tok ol laik mekim sampela moa klasrum na haus tisa bai inap sumatin i ken stap long wanpela klasrum wantaim tisa,

Em i tok ol i wetim yet Edukesen Dipatmen long kisim Tusen

People connecting Business People



# PNG Air

CENTRAL RESERVATIONS

Phone: + 675 7222 2151 | Fax: + 675 325 4867  
TOLL FREE NUMBER 16111 | Email: reservations@pngair.com.pg

# Ol US Presiden kendidet tok resis gen

**Frieda Sila Kana i raitim**

**YUNAITET Stets bilong Amerika Presiden Kempein i wok long go klostu moa long taim bilong ileksen long Novemba, na tude bai narapela dibet o tok resis i kamap.**

Em bai las pastaim long ileksen. Long namba tu tok resis i bin kamap long Mande 10 Oktoba, meri kendidet na pastaim Seketeri bilong US, Hillary Clinton i winim namba tu dibet o tok resis bilong Presiden long las wik, wantaim 57 pesen antap long birua bilong en Donald Trump husat i kisim tasol 34 pesen.

Maski sampela lain long Ohio Yunivesiti i tingting olsem Donald Trump i mekim dibet bilong em gut moa long pastaim dibet wantiam 63 pesen winim Hillary Clinton wantaim 39 pesen, dispela i no senisim tingting bilong ol lain husat i givim vot bilong ol long

CNN nius midia olsem ol i ting Clinton em i winim dispela dibet.

Long namba wan Presiden Dibet i bin kamap long 27 Septemba, Misis Clinton i bin winim dibet long 62 pesen na Donald Trump i bin kisim 27 pesen.

As tingting bilong holim ol dibet em long helpim tingting bilong ol pipel bilong Amerika sapos man o meri ol i laik makim em bai stap trupela man o meri long bosim kantri bilong ol. Dispela kain samting em i helpim ol long save gut pastaim long ol i tromoi vot bilong ol long Novemba 4, 2016.

Hillary Clinton, em i gat longpela taim stori bilong wok long pablik laip na politik, tasol Donal Trump em i no gat ekspirians long pablik opis tasol em i wanpela bikpela bisnisman long Amerika husat i gat ol bikpela bisnis.

I gat bikpela ol toktok i kamap long tupela kendidet i sutim tok long wanpela narapela we i mekim

ol nius man na meri bilong CNN i yusim long kisim tingting bilong moa pipel olsem ol sapota na ol wokman na wokmeri bilong tupela keniet long kempen bilong tupela.

Kain ol toktok olsem, Mista Trump em i no save baim ol inkam takis bilong em inap long 20 yia samting we em yet i ting olsem em i soim olsem em i gat moa save long abrusim takis tasol em i yusim wanpela hap rot i stap long em inap yusim.

Misis Clinton i gat asua long planti (33,000) email toktok long praivet komputa bilong em we i gat sampela toktok bilong sekyuriti bilong kantri i bin stap long en, tasol em i bin rausim pastaim long ol FBI i lukim. Ol FBI i tok, Clinton i no bin was gut long ol toktok long email



**Donald Trump na Hillary Clinton long taim bilong presiden dibet long Hofstra Yuniversiti 2016. Foto: Drew Angerer/Getty Images**

we inap long ol birua bilong kantri i kisim na bagarapim kantri bikos em i bin stap olsem U.S Seketeri bilong Stet.

Yunaitet Stet em i wanpela supa pawa na em i gat bikpela invesmen

long PNG olsem kampani we i ranim LNG na tu ol narapela bikpela wok insait long sosel, iekonomik na politikal developmen bilong kantri.

## Sir J tok tenkyu long Westen Hailans

**Ahimsa Kibikibi i raitim**

GAVANA Sir Julius Chan i tok tenkyu long ol pipel bilong Westen Hailans na wanwok bilong em, Gavana Paias Wingti long holim tripela gutpela de long lukluk raun bilong em we ol i bin lonsim buk bilong em tu.

Sir Julius i bin go long Maun Hagen long singaut bilong Mista Wingti, long lukluk raun insait long Maun Hagen taun na bihain long ol gavman projek tupela wik i go pinis.

Sir J i tok, "Em i bin tripela gutpela de we i bin stat wantaim kamap bilong buk bilong mi, *Playing The Game* we mipela i bin salim 1000 buk na ol tisa wantaim ol bisnis haus na pablik i bin helpim na stap long ol samting i kamap."

Bikpela lain manmeri i bin kam bung, namba olsem 7000 i go insait long Maun Hagen Kwin Pak long tok welkam long Sir J na long lukluk kamap bilong buk bilong em long Fonde wik antap. Planti skul sumatin na



**Sir Julius Chan wantaim Paias Wingti na ol gavman opisa wantaim ol bisnis patna bilong tupela i bung long Maun Hagen. Foto: NIGP Midia yunit.**

ol tisa i bin kamap na provin-sal gavman i bin givim pablik holidet long ol long kam lukim dispela taim.

"Mi kirap nogut na amamas long gutpela pasin ol i soim na

rispek na ona ol i givim long mi na mi tenkyu long ol bisnis pren na sapota bilong Gavana Wingti na ol projek na infrastraksa na taun developmen we i kamap aninit long lidasip

bilong en."

Sir J i go bek long Kavieng long Sande 9 Oktoba we em i bin bungim ol Maris Brata Koles Ashgrove lain i kam long Australia.

## GG tok sori long King bilong Tailan i dai

GREN Sif Sir Michael Ogio, Gavana Jeneral bilong Papua Niugini i salim tok sori bilong em i go long ol pipel bilong Kingdom bilong Tailan long dai bilong King bilong ol, na het ov stet, King Bhumbol Adulyadej.

King Bhumbol Adulyadej, em i winim taim bilong olgeta king na kwin long wol long stap olsem king na het ov stet inap 70 yia. Em i bin dai long las wik Fonde 13 Oktoba, 2016 na ol pipel bilong em nau bai stap long haus kraik inap long wanpela yia.

"Long makim ol pipel na Gavman bilong Papua Niugini, mi salim bikpela tok sori bilong mipela i go long ol pipel na gavman bilong Kingdom bilong Tailan, long dai bilong gutpela King bilong ol, King Bhumbol Adulyadej. King Bhumbol em i stap tru long lewa bilong ol pipel bilong Tailan na ol i save rispekim em olsem wanpela god bilong ol.

"Em i bin go pas na strongim wok bilong Tailan i senisim gavman sistem bilong en long wanpela militeri diktetasi gavman sistem na i go long demokretik sistem. Planti taim em yet i bin traim long bosim gavman bilong em long mekim wok bihainim pasin bilong demokrasi olgeta taim.

"Stori bilong em i no givim gutpela tingting long ol pipel bilong Kingdom bilong Tailan tasol, nogat.

Em i givim gutpela tingting long olgeta hap bilong wol. Mipela i tingim ol pipel bilong Tailan na gavman bilong Kingdom bilong Tailan long taim ol i wari na kraik long gutpela King bilong ol i lusim ol pinis," Gren Sif Sir Michael i tok.



# Marist brata i lukluk raun long Nu Ailan skul



## Yumi bosim developmen bilong yumi yet

YUMI olgeta i laikim developmen. Yumi lukim developmen olsem wanpela samting ol narapela i mas givim yumi.

Tasol developmen em i wanem samting tru? Planti i tok gutpela rot, naispela haus, gutpela hausik, gutpela skul. Em tru tasol bikpela samting long dispela tok 'developmen' em i tingting na pasin bilong yumi. Yumi lukim developmen olsem wanem na yumi mekim wanem long helpim o bagarapim.

Mi raun long planti hap long PNG na mi lukim rot i bruk bruk, no gat bris, no gat haus sik i sanap o nes i stap tasol i no gat marasin, skul pikinini i stap na tisa i stap tasol i no gat klasrum.

Mi tingim long Madang long las ileksen taim nupela lida i win ol sapota bilong olupela lida i kukim wanpela bris. Na ol i ting ol i bagarapim husat? Ol i bagarapim ol yet. Nau ol dispela pipel i pulap long kakao tasol ol i mas hatwok long karim long baksait bilong ol i kam long bikrot.

Mi tingim tu narapela projek em wanpela haus sik. Dispela haus sik i sanap long gutpela hap we olgeta i ken kam yusim tasol sori, nes i go kaikai buai long maket stap. Bilong wanem? Em i no gat marasin bilong givim sik manmeri o pikinini.

Planti komyuniti long PNG i bruk, bruk nau bikos ai bilong ol i pas long ol samting i kam long ausait na yumi no tingim long mekim gut samting olsem em bai inap helpim yumi.

Yumi ting haus sik em inap tasol yumi no helpim long bringim marasin i kam. Yumi tok em i wok bilong ol nes o ol lida. Yumi ting yumi ken kukim bris i go daun tasol yumi lusim tingting olsem yumi pasim yumi yet nau long rot bilong go long maket.

Dispela kain ol longlong tingting i mas stop. Yumi lukim laip bilong ol arapela na yumi mangal tasol yumi no tingting yumi gat olgeta samting long mekim wanpela naispela samting bilong helpim yumi yet.

Mi tingim nau dispela taim ol pikinini bilong yumi i sindaun long tes. Neks yia long Janueri ol skul bai i pulap tru long ol pikinini i painim spes long gret 9 o 11.

Yumi subim ol pikinini i go insait tasol ol i no gat ples bilong sindaun. Tisa i sotwin nau bikos namba em inap holim insait long klasrum i abrusim mak olgeta.

Olsem wanem bai yumi larim tasol olsem? Dispela ol piksa i soim yumi, yumi mas sanap nau. Yumi mas helpim yumi yet. Husat papagraun i amamas long givim graun bilong em long sanapim wanpela skul? Husat yangpela bai i was long bris na olsem rot i ken stap olgeta taim long helpim ol pipol? Husat bai i go long taun na karim marasin i kam?

Pasin bilong wokbung na helpim komyuniti bilong yumi yet i mas stap. Yumi mas bosim developmen bilong yumi yet.



Ol Marist Brata bilong Australia i go olsem visita long Nu Ailan.

**LUKLUK raun bilong tripela Maris Brata em i wanpela gutpela samting i bin kamap long ol sumatin na ol tisa bilong tripela Sekenderi Skul; Konomatalik, OLSH na Madina long Nu Ailan Provins.**

Ol i bin kisim ol tripela senia diginteri bilongol Maris Brata Koles Ashgrove long Brisbane, wanpela bilong premia skul bilong Australia.

Ol visita em Hetmasta, Peter McLoughlin wantaim Presiden bilong Old Boys Asosiesen, Dominic Melrose na Tony Hogarth, pastaim Presiden. Wokabout bilong ol i bihainim singaut bi-

long Nu Ailan Gavana, Sir Julius Chan long strongim pasin bilong ol skul i bung wantaim na senisim tingting i go i kam wantaim koles em yet i bin go skul long en, wantaim ol skul long Nu Ailan.

Ol skul i kirap no gut na amamas long dispela kain sans ol i gat long bung wantaim na tok welkam long ol visita bilong ol olsem Prinsipel bilong Konomatalik Sekenderi Skul, George Paraskos, na Bod Siaman. Mista Paraskos i tok tenkyu long Gavana Sir Julius Chan long putim Nu Hanova i go insait long dispela raun bilong ol na em i tok dispela em i bikpela samting we

bai stap longpela taim long tingting bilong ol sumatin.

Ol Maris i kisim gutpela taim long ran long bot MV Atonomi i go long Konomatalik na ol lukim ol naispela ailan na solwara bilong Tigak na Nu Hanova na i stop long belo kaikai long Lissenung Ailan Risot na long welkam bilong nait wantaim Sir Julius.

De bilong ol i bin stat wantaim sampela toktok bilong Nu Ailan edukesen polisi na gutpela implementesen insait long ol yia bilong edministresen na long lukluk raun long OLSH Intenesenel Skul na Madina Gels Sekenderi Skul.

Gavana Sir J na Provinsal Edministreta na wokman i bin go wantaim ol visita bilong Maris Koles i go long Madina na Laraibina Eels i givim tripela kain lukluk bilong wanpela ruel skul. Wanpela skul bilong ol pikinini meri tasol na wanpela intenesenel ko-edukesen skul long Nu Ailan.

Sir J i tokim ol visita long taim bilong kaikai long nait olsem Gavman i tok welkam long ol long Nu Ailan na olsem kam bilong ol em i infomol na personal na em i amamas tru long kisim ol tripela visita bilong skul we em na ol famaili bilong em i bin

go skul long en.

Brata bilong em Michael na pikinini bilong Toea husat i bin raun wantaim ol dispela bikman olsem ol olupela boi bilong skul.

Astingting bilong visit, Sir J i tok, "I stap long tingting bilong mi long painim spes bilong 10-pela sumatin bilong Gret 11 na Gret 12 level long go skul long Australia bikos mi pilim strong olsem dispela integresen, eksposa na level em i gutpela bilong ol yangpela na ol sumatin husat i wok long gro yet."

Ol Marist Brata Ashgrove visita i go long Kokopo na i go bek long Pot Mosbi.

## Hohola Komyuniti Koles holim greduesen

**Frieda Sila Kana i raitim**

Long Fraide 14 Oktoba 2016, Hohola Komyuniti Koles i holim namba 4 greduesen bilong en long Hohola Yunaitet Sios.

Hohola Komyuniti Koles em i trupela grasrut koles bilong helpim ol lain husat i laik helpim ol pikinini long komyuniti. Em i namba 16 yia long Hohola Komyuniti Koles i wok long lainim ol yangpela manmeri long wei bilong skulim ol liklik pikinini na tu long lainim ol save bilong wokim bisnis o ranim bisnis.

Strongpela toktok i bin kam long Pastor bilong Hohola Yunaitet Sios, Reveren Minista Igo Baru olsem wanem samting ol lain i greduet bai wokim long laip bilong ol, ol i mas stap strong insait long Jisas olsem tok i



Ol lain husat i bin stap long greduesen long Fraide 14 Oktoba. Poto: Frieda Sila Kana.

stap long Jon sapta 10 na lain 10.

Siaman bilong Koles, Nopa Raka i tok amamas long Dairekta na Prinsipal bilong skul, long givim kain sevis i go long komyuniti. Em i tok amamas tru long ol patna olsem Hohola Komyuniti yet, Nesenel Trening Kaunsil, Dipatmen bilong Edukesen, NCDC, olupela memba

bilong Mosbi Not Wes, Sir Mekere Morauta na nau Memba Michael Malabag na ol narapela lain husat i helpim skul i kam inap long nau.

Em i tok, Hohola Yunaitet Sios kongrigesen i putim toktok bilong ol long wok na ol i givim ples bilong dispela kain komyuniti sevis bai kamap.

I gat 26 lain husat i kisim trening inap long 8-pela mun long Lainim ol Pikinini taim ol i liklik tru yet. Sampela bilong ol i yangpela man na meri na planti ol marit na i gat narapela kain skul pinis na i wok tasol ol i lukim gutpela samting long dispela skul na ol i go bek gen long lainim moa.

PNG Edukesen Insitut i stretim ol akreditesen bilong ol lain i kisim ECHL (Early Childhood Learning) setifiket long ol inap long kamap Elementri Skul tisa.

Long neks yia koles bai givim ol hai kwalifai kos tasol planti taim ol sumatin i no save baim gut ol skul fi bilong ol na ol dairekta yet i save rausim mani long poket bilong ol yet long baim ol samting bilong skul.

Skul fi em i K1,500.

## Save na Mekim

Sapta 2

...moa yet long hap 1 (Taro)  
Kaikai bilong givim strong

### SAMPELA WANTOK BILONG TARO

#### PARAGUM

Piksa i soim wanpela man long Niu Ailan, em i sanapim paia wut long as bilong dispela taro yumi save kolim paragum.

Man i save kaikai as o namel bilong en. Em i wnapela spia kaikai, long wanem, em inap i stap longpela taim long graun na i no ken bagarap kwik. Taim sampela kaikia i sot, dispela paragum i ken helpim man.



Em i save kamap gut long ples hat.

#### TARO BILONG TAIS

As na namel bilong en em i kaikai bilong abus na bilong man. Man i save kukim lip na plaua bilong en tu olsem kumu.

Dispela taro i ken kamap gut long tais, na i kamap gut long graun i gat sol, long kain graun sampela arapela kaikai i no inap kamap long en.

Dispela taro em i spia kaikai long taim bilong hangre.

# Ol yangpela lida lainim ol wanlain long ol SDG

WANPELA yangpela Papua Niugini meri nau i wok long lainim na strongim ol narapela wanlain bilong en long kirap na luksave long ol Sastenebel Developmen Go (SDG), em ol global mailston o mak we UN i putim long senisim dispela wol.

Bronwyn Kili, 19 krismas i bin makim kantri long stap long lkonomik Sosel Kaunsil (ECOSOC) Yut Forum long stat bilong dispela yia long Yunaitet Nesen, na em i kisim moa save long ol SDG na em i tok long skruim wok bolong SDG namel long ol yangpela.

Mis Kili i bin wok olsem wanpela pia eduketa wantaim Yut Adolesens Helt Klap (YAH) na Yangpela Wimen Kristen Asosiesen (YWCA) long planti yia, olsem na taim em i gat 19 krismas tasol, em i gat bikpela save long lainim ol narapela yut.

Narapela yangpela meri husat i helpim em, Jeanette Ila, husat em i wanpela pia eduketa long YWCA, i bin oge-naisim wanpela bung long las wik long kirapim tingting bilong ol yangpela lain long SDG.

Ol yangpela i bin kam long UPNG, YAH, Yoga Unite PNG, na Agape Intedinominesenel Ministri Yut na i toktok long ol SDG long wanem we ol i kamap long laip bilong ol yet, na wanem wei ol inap long promotim ol.

UN long PNG i givim wanpela sesen o toktok long senis bilong Milenium Developmen Gol (MDG) i kam long nau na wanem wei ol SDG i kam bung wantaim ol nesenel developmen fremwok an sampela ol ki developmen hevi long kantri.

Ol yangpela i kisim gutpela



Mis Bronwyn wantaim Abigail Havora, Mis Pasifik Pejen long UN ECOSOC) Yut Forum.



Henry Nema bilong Yunaitet Nesens Developmen Program (UNDP) i toktok long bikpela pisa bilong SDG.

toktong bilong strongim ol long luksave long wanem kain pawa ol i gat long senisim sindaun, netwok na komyunikesen kepesiti na inovetiv aidia na long tingting long wanem wei ol wanpela ol yangpela wanlain bilong ol inap long promoted ol SDG insait long ol

skul na komyuniti bilong ol.

“Mi olsem wanpela pia eduketa na yut lida, mi bilip long developim dispela nesen na em i nidim moa lain long mekim wok wantaim gavman. Yumi nidim ol yangpela pipel long mekim moa wok.

Yumi mas no ken wet. Em i bihain taim sindaun bilong

yumi na em i kantri bilong yumi. SDG em i wanpela stia tul bilong developim na senisim kantri bilong yumi long kamap gutpela,” Mis Bronwyn i tok.

UN long Papua Niugini i luksave tu long bikpela wok i stap long kisim ol yangpela yut i kam insait long wok bilong developmen long kantri.

## UN Seketeri Jeneral toktok long De bilong Pikinini Meri

BIKPELA tingting long dispela yia Intenesnel De bilong ol Pikinini Meri em i sanap antap long ol 17 Sastenebel Developmen Gol. Dispela slogan o hap tok i sut long as tingting em: Girls’ Progress equals Goals’ Progress: What Counts for Girls.

Gutpela sindaun, rait bilong ol pipel na givim pawa long ol 1.1 bilien pikinini meri bilong wol em i stap olsem wanpela pos bilong ol 2030 Sastenebel Developmen Asenda. Tam mipela wanbel long dispela asenda, mipela i tok promis long ol pikinini meri olsem ol bai kisim ol gutpela eduken

na helt sevis.

Mipela i gat strongpela tingting long pinisim pasin bilong daunim ol meri na vailens long ol pikinini meri, na ol kain pasin nogut olsem ol yangpela pikinini i save marit. Mipela i tok promis long no ken lusim wanpela bilong ol i stap bihain em yet.

Plantit taim long ol ples, ol liklik taun na ol refuji kem long olgeta hap bilong wol, ol yangpela pikini meri i save stap bak-sait: i no gat gutpela kaikai, no gat heltke o kwaliti eduken na birua long seksual vailens.

Putim mani long helpim ol pikinini meri em i stretpela

samting long mekim na tu em i smatpela samting long mekim. Em i strongpela samting we bai mekim senis long olgeta hap bilong developmen, na em bai i go long ol narapela taim bihain tu.

Tasol samting we mipela i no inap long skelim em mipela i no inap long menesim. Sapos mipela i no bungim inap ripot mipela i laikim baim mipela i no inap tru long save long wanem wei bai mipela i bringim helpim mipela tok promis long givim.

Mipelai mas save olsem ol wok bilong mipela i wok long helpim ol yangpela meri: ol

meri we i stap long rabis tru; ol i stap longwe tru long ruel eria; ol we i gat hevi long bodi bilong ol; ol gel we i stap long ol asples komyuniti; na ol pikinini meri we i lusim ples bilong ol bikos long sampela hevi o bikpela pait bilong gavman o trabel man long kantri bilong ol yet.

Mekim wok bilong bringim ol ripot long taim bai mipela i save long mekim wok long inapim ol tok promis bilong mipela.

Yumi wok hat long bringim olgeta pikinini meri i kam insait, bikos olgeta bilong ol i gat namba.

# Katolik Helt Sevis kisim helpim long Australia Gavman

GAVMAN bilong Australia bai givim K10 milien bilong helpim Katolik Helt Sevis (CHS) i kirapim wanpela ples we ol bai inap long lukautim ol lain husat i gat bikpela sik we i save givim planti pen long ol.

Dispela kain fasiliti ol haus bai gat ol gupela masin na ikwipmen bilong daunim pen long bodi bilong ol. Wanpela toktok i kam long Australia Hai Komisen i tok olsem em i namba wan kain samting olsem bai kamap long kantri wantaim helpim bilong Insentiv Fan, na Katolik Helt Sevis bai lukautim.

Dispela haus sik bai gat gutpela kain masin samting bilong lukautim ol sikman.

Nius ripot i tok, Australia gavman i lukim Katolik Helt Sevis olsem wanpela bilong ol Papua Niugini ogenaiesesen we i save mekim gutpela wok tru na i bin kisim dispela kain luksave long taim Insentiv Fan Statejik Menesmen Grup i bin bung.

Tripela narapela ogenaiesesen Australia Gavman i luksave long ol em; St. Arnol Janssen Human Development Senta long Minge, Simbu Provins (K6.58 milien), Hargy Oil Palm Limited wantaim patnasip bilong Pomio na Is Nu Briten Provins (K3.2 milien) na Nesenel Egrikalsa Risets Institut long Lae, Morobe Provins wantaim Trukai Industri (K2.5 milien).

Australia Hai Komisen Minista-Kausnela, Benedict David i tok, ol dispela 4-pela ogenaiesesen we i winim gen bai wok long ol projek we bai givim pawa long ol meri, strongim ikonmik developm long ol grasrut level an long lukautim ol komyuniti we inap long painim hevi," Mista David i tok.

Hap mani bilong dispela program em bilong lukautim ol sikman na sikmeri husat i save pilim bikpela pen long ol i go long mekim sapot na

riferel network go bikplea insait long pablik helt sistem long helpim moa famili bilong ol lain husat i gat bikpela sik na i save stap long haus.

Insentiv Fan Bod Siaman Valentine Kambori i tok, "Dispela em i amamas taim bilong Papua Niugini bikos dispela fasiliti i kamapim rot we yumi inap long luakutim ol famili bilong yumi long gutpela wei."

Stat long yia 2000 yet Australia i save wok patnasip wantaim Papua Niugini nae m i save givim bikpela mani aninit long Insentiv Fan. Insait long dispela hap, program i sapotim infrastraksa wok praivet sekta wok na long strngim ol meri na ol yangpela meri.

Ol bikman bilong Papua Niugini na ol lain i makim Australia na Papua Niugini Gavman bilong Statejik Menesmen Grup bai bung long mun bihain long toktok long fanding bilong Desemba.

# MV YWAM PNG bai kam bek gen long PNG

YWAM Trening na Medikal Sip, MV YWAM PNG, na ol volantia bilong en bai kamap long Pot Mosbi long dispela wik long statim 8 mun wok bilong ol long Sauten rijon na long Huon Galp.

Ran bilong sip i kamap bihain long ol i pinisim ol namba tri hap wok bilong stretim MV YWAM PNG; long kamapim ples bilong ol sikman na sikmeri bai wetim ol dokta na nes long lukim ol, na long sampela moa ples bilong wokim ol trening, wanpela stok rum na trening spes bilong ol lokal helt woka na wanpela moa bot bilong mekim wok long ol rurel ples.

YWAM Medikal Sip Menasing Dairekta, Ken

Mulligan, i tok em i gutpela long lukim MV YWAM PNG i wok long kam bek long PNG.

"Planti handet saveman na meri bilong heltke na ol saveman bilong wok long solwara na ol narapela lain volantia long olgeta hap bilong wol bai wok antap logn sip MV YWAM PNG insait long 8-pela mun we planti bilong ol em ol Papua Niugini yet. .

"Mipela tok tenkyu long olgeta lain husat i givim sapot bilong ol long kisim mipela i kam inap long dispela kain taim, na mipela redi nau long wokim bikpela moa wok long go aut gen," Mista Mulligan i tok.

Insait long 8-pela mun ol

volantia helt tim bai wokim ol dentis o wok bilong tit, helt sevis long ol mama, imunaisesen, wok long ol ol ai sik, sekim ol helt bilong ol pipel, wokim helt promosen na long lainim ol lokal helt woka.

PNG Papa bilong MV YWAM PNG, Sir Rabbie Namaliu i tok tenkyu long ol Nesenel Gavman bilong PNG, ol gavman bilong Sauten Rijon na Morobe Provinsal Gavman wantaim helpim i kam long ol Australia Eid na grasrut sapota.

"Mipela inap long kam long dispela rot bikos long helpim bilong ol dispela lain. Sapos ol i no helpim bai mipela i no inap long amamas long ol kain sevis olsem," Sir Rabbie i tok.

## Pait long Syria i mekim lapun bubu Eida i kamap refuji ...I gat 115 krismas

PAIT long Syria long Midel Is, em wanpela neiba kantrri bilong Israel, i kamapim bikpela wari, hevi na dai long planti ol pikinini, ol mama, ol yangpela na lapun mama na ol arapela man nating olsem ol refuji.

Long dispela wik, wanpela kain sori stori bilong wanpela lapun mama na bubu bilong Syria i gat 115 krismas em i wanpela long ol refuji we pait long kantri bilong em Syria i mekim na em i ronawe lusim ples long painim seif kantri long stap long en.

Eida em mama na bubu we ol i bilip olsem em i wanpela lapun refuji we krismas bilong em i stap antap tru i wok long ronawe lusim kantri bilong em wantaim ol planti tausen narapela.

Kantri Syria i no bin kamap yet na mama i karim Eida. Long laip bilong em, em mi lukim tupela wol woa na tu, Ottoman Empaia i pundaun.

Long rot nau long painim ples bilong stap bikos long pait long kantri bilong em Syria, lapun Eida i slip long ol raf refuji kem long Greece, planti handet mail longwe long kantri Gemeni, we em i laik go na bungim ol famili memba bilong en husat i go pas pinis long hap.

"Long laip bilong mi nau, mi laik bungim ol pikinini bilong mi gen, na lukim ol," em i tokim CNN wantaim strongpela laik long dispel i mas kamap.

Eida i bin kamap long Moria refuji kem wanpela mun i go pinis na tenkyu long ol famili pren husat i lukautim em gut. Wanpela long ol yangpela man, nem bilong em Ahmed, i karim em long longpela rot i go long ples i seif long Yurop.



Ahmed na meri bilong em, Berivan i gat 4-pela liklik pikinini aninit long 6-pela krismas na meri i gat bel bai em i karim long mun Desemba, tasol ol i mekim bikpela sakrifais long helpim dispela lapun meri.

Ahmed i bin wokabaut tripela awa long ples bilong em Kobani i go long Hasaka, ples bilong lapun Eida na kisim em i go bek long ples bilong em long bungim ol famili na hauslain na ol i lusim Syria. Dispela em 6-pela mun i go pinis.

Lapun Eida i no inap wokabout na dispel yangpela man Ahmed i mekim bikpela wok tru long karim em long longpela rot long Kobani i go long Turkey, we i bin kisim tripela mun.

Lapun Eida i kamap olsem famili memba bilong Ahmed lain ol.

Ahmed i tokim CNN olsem long tripela mun, ol i traime ol rot long go insait long Greece, tasol ol atoriti i no larim ol.

Olsem na em i peim ol solwara smagla long kisim ol long bot na krosim bikpela solwara i go long Greece.

Eida na famili bilong em nau i 7-pela long ol 94,6742 refuji husat i abrusim birua long krosim bikpela solwara i go long Greece.

Moria kem we ol is tap long en i gat 4,000 refuji long en, gavman bilong Greece it ok.

## India dokta wokim hat operesen long PIH



Ol dokta bilong lewa i kam long India i sanap wantaim bos bilong PIH, Dokta Amyna Sultan (namba tu long hankais).

### Paul Zuvani i raitim

PASIFIK Intanesenl Haus sik (PIH) i bringim ol dokta bilong India husat i gat bikpela save long wokim ol hat operesen long dispela wik.

Ol dispela speselis dokta i wokim operesen long 4-pela lain husat i gat sik long lewa long dispela wik.

Tripela dokta i bilong Sal Haus sik, Medikal Institut na Risets Senta, Ahmedabad Siti, Gujarat provins.

Ol dispela dokta em; Dokta Anil Jain (het dokta), Dokta Rajam Modi na Dokta Naman Shastri.

Long taim bilong tokaut long kam bilong ol dispela dokta, Kenol Sandeep Shaligram, Sif Eksekutiv Opisa bilong PIH i tok inap olsem 20 sik manmeri i mas

kisim operesen tasol hevi bilong mani na 4-pela lain tasol i kisim.

Shaligram i tok planti toktok i bin kamap namel long haus sik na ol dokta bipo long ol i kam.

Em i tok ol dokta i bin kisim taim tu long toktok wantaim wanwan ol sik manmeri long skaip (skipe) na wasman bilong ol long ol i save long sik bilong ol, stap bilong ol bipo long ol i redi na kam.

Em i tok wanpela samting tu we i pulim tingting bilong ol dokta long kam em bikos long kantri yet we ol i laik save long wei PNG i stap wantaim ol samting em i gat long em.

Em i tok dispela ol sik manmeri inap tromoi moa long K100,000 sapos ol i go

long narapela kantri long kisim helpim o sapos ol i no go ol inap long lusim laip bilong ol.

Tasol em i tok i gutpela dispela ol lain i kisim helpim wantaim K45,000 mani tasol na dispela i sevim laip bilong ol.

Long ol lain husat i kisim operesen, tripela em ol man na wanpela i meri.

Long taim ol i mekim operesen namba wan sik man em lewa bilong em i wok tasol na i gat hol long lewa bilong em. Em i bin bungim 6-pela lewa bai-pas long taim bilong operesen, namba tu sik man em lewa bilong em i wok 35 pesen tasol na i no strong. Em i bungim 4-pela bai-pas, namba tri sikman em lewa bilong em i wok 15 pesen

tasol na lewa bilong em i no strong tu. Namba 4 em meri we dua bilong larim blut i go insait long lewa na i lusim lewa i go aut i bagarap na olsem ol i mas putim nupela long mekim lewa i wok gen.

Long makim maus bilong ol dokta, Dokta Jain i tok maski ol i kisim sampela masin bilong ol yet i kam long mekim wok, em i amamas long painim olsem PIH tu i gat ol masin i gutpela na winim moa masin bilong planti ol haus sik em i bin go wok long em.

Em i tok wantaim tok orait bilong PIH ol i tingting long kam long kantri long olgeta yia bihain long tripela mun.

Em i amamas na tok tenkyu long kain was na lukaut PIH na wasman bilong ol sik manmeri i givim long ol.



# Yut, Meri na Famili

**Pastor Barbara Lunge**

## King bilong Glori i stap

Rausim sia king long ol pawa bilong sanguma na puripuri man, putim King bilong Glori i go bek long sia king bilong en, em Jisas, "Em i gat bikpela strong tru, na i save win long ol pait," Buk Song 24.

Ol pawa bilong sanguma meri na sanguma man i save wok insait long Papua Niugini long planti ya. Ol dispela pawa em ol man nogut i yusim long winim tingting bilong ol man, long kisim meri or man long marit, long kilim ol narapela pipel na long kisim mani.

Ol dispela kain lain i save wok wantaim spirit pawa bilong satan na ol i ezen bilong satan. Ol i save birua long Kingdom bilong God na ol pipel we God i kamapim long piksa bilong em yet.

Planti bisnis i bin bagarap bikos long ol nogut pipel husat i save jeles na tingting long ol yet. Planti marit i bruk na stap longwe long meri o man em i bikpela pasin ol sanguma na puripuri meri na man i save mekim long kisim mani. Ol man i baim ol long tromoi tok nogut na bagarapim ol narapela lain.

Tasol ol dispela pasin nogut, tingting nogut bilong ol pipel em i mekim God i belhat long ol.

Buk Lo 28:1012 i tok, "Olsem bai olgeta pipel long graun inap lukim Bikpela yet i makim yupela olsem ol manmeri bilong em stret, na bai ol i pret long yupela. Na Bikpela bai i givim yupela planti pikinini na planti bulmakau na planti kaikai moa long gaden long dispela kantri em yet i promis long ol tumbuna long givim long yupela. God i save bosim ren na bai em i salim ren i kam daun long taim bilong ren yet. Na em bai i mekim olgeta wok bilong yupela i kamap gutpela tru. Olsem na bai yupela inap larim ol arapela lain pipel i dinau long yupela, taso yupela i no inap dinau long ol"

Yumi wok long kam long pinis bilong taim olsem na ol dispela pawa nogut i wok strong tru long kamapim bagarap, tasol Tok bilong God i tok olsem ol dispela man na meri nogut em ol hap paiauwat tasol na ol bai paia.

Buk Aisaia 47:12-14 i tok, "Gutpela, yu ken traim yet ol dispela kain kain strongpela pasin i gat pawa yu bin lainim na yusim long taim yu yangpela yet. Ating ol inap helpim yu. Na ating ol inap mekim ol birua bilong yu i pret na ranawe. Planti saveman i save givim tingting long yu, na tingting bilong yu i pas olgeta. Tasol yu ken traim singautim ol man i gat save bilong lukluk long ol sta, em ol dispela man i save kam long yu long olgeta mun na tokim yu long wanem samting bai i kamap long yu. Ating bai ol inap helpim yu. Tasol nogat. Ol i stap olsem gras i drai pinis, na dispela paia i laik bagarapim yu, em bai i kukim olgeta dispela man wantaim na bai ol i no inap helpim ol yet. Tru tumas yu no ken ting bai yu inap go sindaun klostu long dispela paia na hatim skin bilong yu. Nogat. Dispela paia bai i kukim yu olgeta."

Ples bilong ol puripuri manmeri na sanguma manmeri em dai bilong oltaim, oltaim. Yu mas stonim ol inap ol i dai, Tok bilong God i tok long buk, Wok Pris 20: 26--27."

Ol toktok we yumi mekim nau em i kot bilong God long ol dispela pipel husat i save apim nem bilong ol yet na strongpela pasin na i no gat save. Tude yupela dispela kain pipel bai lusim sia king bilong yupela na kam daun bikos dispela graun na ol pipel em ol bilong God. God nau i wokim pai bikos PNG em i kamap kavanen kantri na mipela em pipel bilong God. Pastaim Prais Minista bilong mipela em i sainim wanpela tok promis o kavanen long stap aninit long God bilong Israel, aninit long wanpela God.

Ol Kristen i wok long kirap nau na bikpela senis i wok long kamap long olgeta hap bilong Papua Niugini. I gat selebresen, singsing, danis bikos God i winim pait long taim bilong em yet na daunim olgeta pawa bilong puripur na sanguma.

Tasol i gat sans yet long ol dispela lain husat i save mekim ol kain pasin long tanim bel na lusim ol kain pasin nogut na i go bek long God. God bai lusim rong bilong yupela na bai kisim yupela bek olsem ol pikinini man bilong em." Jon 1:12-13.

Sapos yu laik save moa o yu laikim sampela helpim, ring long mobail namba; 76238826/79638276 or email long, jhoshea43@gmail.com.

# Ol Katolik bisop sindaun long Komyunikesen woksop

**Bisop Donald Francis Lippert, O.F.M. Cap. i raitim**

**SOSEL komyunikesen em wanpela long ol eria we ol Katolik Bisop bilong PNG na Solomon Ailan i bin glasim insait long komyunikesen woksop ol i bin sindaun long em sotpela taim i go pinis long Pot Mosbi.** Komyunikesen em i bikpela samting long laip na wok bilong bisop na em i mas wanpela gutpela komyuniketa.

Em i save komyuniket olgeta de long ol kain kain level. Na olsem ol sefed long ol daiosis long PNG na SI, bikpela wok bilong ole m long komyuniketim o autim Gutnius bilong Jisas i go aut.

Dispela komyunikesen woksop long Emmaus Senta long Don Bosco Teknologijel Institut long Taurama, Pot Mosbi i bin lukluk long sosel komyunikesen we ol i lukim olsem wanpela bikpela samting long wol tude.

Pater Fabrizio Colombo, MCCJ, dairekta bilong SIGNIS Sevis long Rome em hap bilong Vatican komyunikesen dipatmen i bin go pas long dispel woksop wantaim helpim bilong Sister Daisy Lisania msc na Pater Ambrose Pereira, SDB.

Woksop i bin autim planti gutpela infome-



**Ol bisop wantaim ol DBTI sumatin na sosel media. Pater Victor Roche SVD i lainim ol rot bilong sosel media long wanpela DBTI sumatin. Ol Foto: Pater Ambrose Pereira**

sen na prektikel sait.Em i bin stat wantaim diskasen na tokim stori, wanpela strongpela rot bilong komyunikesen long PNG.

"Tokim wanpela gutpela stori bai kisim infomesen i go aut hariap. Ol Gospel i soim olsem

Jisas i wanpela gutpela man long tokim stori olgeta taim," Bisop Lippert i tok.

Ol bisop i bin lainim ol samting we ol i mas bungim wantaim long kamapim strongpela stori, na ol i bin gat sans long prektisim ol samt-

ing we ol i bin lainim, olsem wokim intaviu, rekotim na prisanim'

Ol bisop i bin gat bikpela intres tru long sosel media na intanet we planti pipel long wol na tu, PNG i yusim.

Pater Fabrizio i bin toktok long ol kain kain

rot bilong sosel media network olsem Facebook, Twitter, Google+, WhatsApp, na moa, na ol Bisop i bi n kirap nogut long harim olsem planti milien na bilien pipel long wol i wok long yusim ol dispel rot bilong sosel media.

Bihain long ol bisop glasim na skelim ol gutpela, ol birua na nogut bilong sosel media, ol i bin gat sans long sea, lukim na harim long 15-pela yangpela sumatin bilong DBTI husat i gat save long yusim sosel media.

Ol bisop i bin lukim olsem sosel media stap nau long PNG na wol, na em bai stap na i no inap raus, na maski long ol salens, ol i mas yusim ol dispela nupela sosel media long autim Gutnius i go aut long pipel na moa yet, ol yut.



**Ol bisop husat i bin stap long komyunikesen woksop.**

# Ol Lutheran meri mas skul long Martin Luta Seminari

**Nick Malaka i raitim**

**NAMBA 15** Nesenel Meri Konpens bilong ELC PNG Lutheran Sios i bin kamap wantaim kala long openim seremoni i bin kamap long Is Simbu Distrik long Simbu provins.

Dispela konpens i bin bringim olgeta 17-pela distrik meri bilong ELCPNG Lutheran sios long Hailans, Momase, Sauten na Ailan rijon i kam bung long Is Simbu.

Long opisel opening, Het Bisop bilong ELCPNG Lutheran Sios, Reveren Jack Urame i bin tok amamas long olgeta meri i kamap long konpens.

Reveren Urame i tok dispela de em i spesel long wanem, em i konpens bilong ol meri bilong ELC PNG.

Het Bisop i bin toktok moa olsem, sapos i nogat helpim bilong ol meri insait long sosaiti, olgeta wok ino inap long karim kaikai long laip bi-



**Ol Lutheran meri i pre long statim konpens bilong ol. Foto: Nick Malaka**

long ol wan wan manmeri.

Reveren Urame i tok tok strong long hetmeri bilong ol 17- pela distrik long salim ol meri i go skul long Martin Luta Seminari na stadim ol subjek olsem Ministri, Baibel na Tioloji taim ol i greduet, ol i ken wok

insait long sios.

Em i tok moa olsem, em i laik lukim ol meri i pinisim gred 12, na ol meri i wok pinis husat i gat bel tru long wok insait long sios i mas go skul long Martin Luta Semineri.

Het Bisop i tok, ELCPNG Lutheran Institut bilong Haia Lening i tok

orait long ol meri i ken stadim tioloji long setifiket level i go inap long basela digri level insait long Martin Luta Seminari.

Het Bisop i tokim olgeta manmeri i kamap long opisel openim bilong meri konpens olsem, Het Bisop bilong ELC Lutheran sios bilong Amerika em i meri, na

sampela ol arapela het bilong depatmen bilong Lutheran sios insait long wol em ol meri.

"Mi gat tingting long planti ol meri i mas mekim wok insait long sios long wanem, ol meri ol i baksait bun tru bilong ELC PNG Lutheran sios hia long PNG, Het Bisop bilong ELCPNG Lutheran Sios i tok.

# Skelim na painim rot bilong helpim kantri long taim bihain

I GAT tupela moa mun i stap na dispela yia 2016 bai pinis. Long neks mun, Novemba, nesanel gavman bai tokaut long baset bilong 2017. Na long mun Mas neks yia bai ol wok bilong dispela gavman i pinis na kantri bai redi long nesanel ileksen.

Ol pablik sev an husat i laik resis long nesanel ileksen i mas lusim wok bilong ol nau. Planti i givim nem pinis na sampela bai givim nem bipo long dispela mun Oktoba i pinis.

I gutpela tu sif seketeri i tokaut olsem ol dispela lain i no ken ting sapos ol i lus long ileksen, bai ol i go bek gen long pablik sevi na kisim wok bilong ol. Nogat. Dispela pasin bilong bipo i pinis nau.

I bin gat planti bikpela na gutpela samting i kamap long dispela yia. Gavman i strongim ol wok bilong en bihain long ol i winim vot i no gat bilip. Oposisen i gat moa memba nau na i bin gat planti gutpela dibet i kamap long taim Palamen i bin bung.

Moa bikpela wok i kamap long sanapim ol rot na bris na ol bisnis insait long kantri. Sampela bilong ol i wokim seremoni bilong brukim graun tasol wok tru i no kirap yet. Sampela wok i pinis na kantri i yusim nau.

Na sampela i stap namel nau. Neks yia em i ileksen yia olsem na gavman bai i traime strong long pinisim sampela moa bi-



Jada 0161

long ol dispela bikpela wok long pulim vot bilong ol pipel.

I no gat asua long dispela. Em i pasin bilong politiks.

Tasol bikpela askim i stap yet long ol ples i stap longwe tru.

Long taim ol bikpela wok i kamap long ol siti na taun, no

ken lusim tingting long ol dispela ples. Long taim bilong skelim mani i go long ol wok insait long kantri, no ken lusim tingting long ol pipel i stap longwe na i no gat sans long kisim gut gavman sevis. Ol i gat wankain rait long lukim kaikai bilong ol divel-

opmen projek.

I gat planti toktok i kamap long wok mani bilong kantri. Dispela Saplamenteria Baset bilong gavman i soim ples klia olsem yumi sot long mak bilong mani long 2016. Sampela save-man i tok kantri i no kisim mak

bilong mani yumi ting bai kamap long taim yumi salim ol kain samting olsem oil, kopa na ges.

Ol kes krop olsem kopi na kakao tu i no stap long gutpela mak na i no bringim gutpela profit i kam bek long kantri. Long taim kain kain toktok olsem i kamap, i gutpela long skelim gut pasin yumi spendim mani bilong kantri.

Pasin bilong givimaut dinau mani em i bikpela bisnis long ol kain ples olsem Mosbi.

Planti famili i kisim taim bikos papa o mama i mas bekim dinau mani long taim ol i kisim potnait pe bilong ol.

Mekim olsem na planti famili i save stap olsem ol tarangu oltaim.

Wankain olsem kantri bilong yumi tu. Sapos yumi wok long kisim ol bikpela dinau long ol ovasis benk long putim insait long baset bilong kantri, bai ol jeneresen long bihain taim i bungim bikpela hevi tru long bekim ol dispela dinau.

I no gat tok long kisim dinau, tasol i mas gat gutpela plen i stap long rot bilong bekim dinau. Ol egrikalsa bisnis em i wanpela rot i ken helpim long bekim ol dispela kain dinau.

Sapos yumi strongim ol nau bai i gat rot i op.

Yumi no ken givim moa strafe long ol tumbuna long bekim ol dinau yumi kamapim tude.

## Skul bilong sev ap



PASIN bilong bungim na sevim samting long yusim long taim bihain i no ken nupela long yumi Papua Niugini.

Dispela ol manmeri i mas save na klia.

Sapos em kaikai bilong nupela gaden, bilas bilong singsing, mani bilong baim meri o bilong taim bilong dai, ol tumbuna bilong yumi i save sev ap.

Ating mani bilong yusim long bisnis i senis wantaim Kina na Toea tasol pasin bilong tumbuna i stap yet.

Long laip wanpela i ken mekim gut long wanpela o rabisim em yet long kain tingting em i gat long sevi ap.

Sapos em i sev ap em i gat samting long yusim long bihain taim tasol sapos no gat, em bai no gat samting.

Taim bilong sev ap em taim wanpela i gat planti samting long wanpela taim. Sapos em i kisim kaikai long nupela gaden o i gat planti kaikai

long wanpela taim em i mas putim sampela kaikai olsem yam, mami o saksak long said.

Na taim kaikai i sot em bai yusim dispela ol kaikai.

Long skelim dispela pasin wantaim nupela pasin bilong mekim bisnis, sevim Kina na Toea, manmeri no ken paul.

Yes wanpela i ken tok, em i isi long tok tasol i hat long mekim. Dispela em bikos long wan wan ol sindaun.

Long tumbuna pasin wanpela bai tok dispela yia kaikai i no kamap gut bikos long hat bilong san, bikpela ren o graun i no gutpela na kaikai i

no kamap gut o karim.

Long nupela taim wanpela bai tok wanpela i no wok mani, o i wok tasol pe i liklik.

Olgeta dispela sindaun i tru na i save kamap na stap.

Tasol long nau Skelim Tingting i kisim taim na i laik strongim tingting bilong wanpela long pasin bilong sev ap.

Em i tok long laip wanpela i gat planti samting long wanpela taim, sapos em kaikai, klos, bilas, samting bilong mekim haus o mani em i mas sev ap. Bikos i gat taim wanpela bai sot.

Wanpela rot bilong sev ap em stori bilong wanpela man bilong Babylon, nau kantri Irak.

George S. Clason, bilong Amerika i bihainim dispela stori na i kamap mani man.

Babylon stori i tok long olgeta samting wanpela i mekim o i kamapim, wanpela i mas baim wanpela pastaim.

Clason i stat wantaim stori

bilong Arkad – husat i kam long bikpela famili tasol i pikinini bilong wanpela liklik bisnismen.

Dispela mangi i no wari sapos ol narapela i bikpela bisnis man o mani man, em i daunim em yet na bihainim tok wanpela man bilong givim dinau mani i tokim em.

Dispela man bilong givim dinau em nem bilong em Al-gamish.

Wanpela taim ol poro bilong Arkad i askim long wanem rot em i kamap bikpela mani man olsem.

Arkad i bekim na tok, "Tokim yu yet olsem, 'wanpela hap bilong ol samting mi kamapim bai bilong mi yet!'"

"Mekim dispela tok taim yu i kirap long moning, taim yu wok long de na taim yu redi long go slip. Mekim dispela tok long olgeta aua inap em pas long laip bilong yu."

Em i tok taim yu mekim olsem yu gat samting long yusim long bihain taim.

# Tupela LO bilong Ramu Nikol bungim ol *Wantok* *Niuspepa*

**Nicky Bernard i raitim**

**WANTOK Niuspepa em i pepa bilong ol manmeri long ples we ol i save ridim na kisim tok klia long wanem samting i wok long kamap long kantri bilong yumi.**

Tupela Lenona o papa graun bilong Ramu Nikol long Madang i bin kam raun long Mosbi las wik long wanpela bung bilong ol.

Dispela bikpela bung bilong ol LO na ol lain long Ruma Nikol em long kamapim gutpela wok namel long ol yet. Na dispela bung i kamap Dream Inn Hotel long Mosbi.

Dispela bung i bringim tupela len ona long kam long Mosbi na tupelo i bin laik lukim opis bilong *Wantok Niuspepa* long wanem, tupela i save karim ol bandel *Wantok Niuspepa* na go insait tru long wan wan ples klostu long Ramu Nikol Kampani na givim i golong ol pipel long ridim *Wantok Niuspepa*.

Dispela tupela len ona em long Boni Yambai na John Koti. Olgeta wik, tupela i save go long het opis bilong Ramu Nikol na kisim bandel *Wantok Niuspepa* na go bek insait long ples na lusim long wan wan haus lain.

Ramu Nikol i gat wanpela tok-save i save ran insait long *Wantok Niuspepa* olgeta wik, na dispela i save mekim ol lain long ples long ridim na save wanem samting i wok long kamap insait long Ramu Nikol projek.

Boni na John i bungim wanpela long taim man bilong *Wantok Niuspepa* na man husat i save droim ol katun insait long *Wantok Niuspepa*. Jada Wilson i bin go bungim wanpela wok man bilong *Wantok Niuspepa* bipo. Taim Jada i go insait long bung bilong ol len ona, wok man bipo em John Rop, we em bin tokim ol len ona olsem *Jada Wilson* em i wok man bilong

*Wantok Niuspepa*. Dispela tupela len ona Boni na John i ran kam na holim Jada na tokim olsem tupela save dai kirap long droing bilong em.

Taim kemera man bilong *Wantok Niuspepa* i go long kisim piksa tu, tupela Boni na John kam na bungim kemera man bilong *Wantok Niuspepa* na sekhan wantaim em na tokim em olsem ol save lukim nem tasol na nau ol bungim pes bilong dispela kemera man. John i tok, olgeta wik, em i save go



**John Koti i holim *Wantok Niuspepa*.** *Poto Nicky Bernard*

**Boni Yambai long han kais i sanap wantaim Jada Wilson long namel na John Rop long han sot.** *Poto Nicky Bernard.*

long ol media lain bilong Ramu Nikol na kisim bandel pepa na go bek long ples na givim long ol manmeri bilong ples.

Boni tu em wankain, tasol em i tok ol ples lain nau i save ridim gut *Wantok Niuspepa* long wanem, meri bilong em i mekim liklik skul long soim ol ples manmeri long

save long rit na rait. Em *Wantok Niuspepa* i mekim isi stret long ol ples manmeri long save long rit na rait.

Tupela wantaim ol narapela len ona i lusim Mosbi long wiken na go bek long Madang na bihain bai go olgeta long ples.

# PATER GARUAI, SVD WOK MISIN LONG ZIMBABWE



**Paul Zuvani i raitim**

**PATER Alex Garuai, SVD, bilong ples Rorovana, Arawa long Atonomos Rijon bilong Bogenvil i wok misin long kantri Zimbabwe long Afrika.**

Em i bin stat wok long 2010 i kam inap nau.

Em i kam bek long kantri long kisim malolo na bai go bek.

Dispela em namba tu taim Pater Garuai i kam long kisim malolo. Pastaim em bin kisim malolo long 2013.

Bipo long em i go long Madang na bihain go long Bogenvil, Pater Garuai i kam raun long Wantok Niuspepa i kisim stori bilong em.

Hia nau toktok bilong Pater Garuai long misineri wok bilong em.

Garuai i bin kamap pater long 1998 na bihain i go wok long Dirima peris, Gembogl long Simbu provins.

Bihain long dispela, em i go stap wanpela yia long Philippines.

Bihain long dispela em i kam bek na i stap wok long Kuriva peris, Sentral provins.

Long 2010 Sosaiti i makim em long go wok misineri long Zimbabwe, Afrika we i stap wok inap nau.

Long Harare, biktaun bilong Zimbabwe em i lainim tok ples Zimbabwe long 6-pela mun.

Bihain long dispela pater supiria bilong em i makim em long go wok long St Bernadette peris, Water Forth long Bulawayo Asdaiosis.

Em i wok long dispela hap long tupela yia inap long 2013 we supiria i makim em long wok long Gomosa Misen, Hwange Daiosis we em i stap wok nau.

Pater Garuai i tok wok bilong em namel long ol Zimbabwe manmeri i bin gutpela.

Em i tok ol i gat spirit bilong wok bung, koperesen na i no gat planti kros pait long ol samting.

“Sapos wanpela memba bilong famili o komyuniti i nidim helpim, ol i givim helpim tasol,” Fr Garuai i tok.

“Long wok bung pasin planti bilong ol i pinisim gut skul bikos famili na komyuniti wantaim i bung na helpim.”

“Sapos wanpela ausait man o meri i laik komyuniti i save gut long tok em i givim long ol em i mas save long tokples bilong ol.

“Dispela i wankain long wok bilong autim Gutnius.”

Pater Garuai i tok arere long Gomosa bikples peris, i gat 22 arapela autstesien we em i mas wokabout na mekim wok.

Em i tok i gat tupela Zimbabwe Katolik diaosis, em Hwange na Bulawayo.

I no gat planti Katolik manmeri long Zimbabwe olsem Papua Niuiini maski ol i bikpela namba bilong ol manmeri olsem 13 milien olgeta.

Long taim bilong lotu, inap long 50 manmeri bai kamap long bikpela stesin na long ol ol autstesien inap olsem 10 o 20 manmeri tasol i save stap na kamap long lotu.

Garuai i tok bikpela lain manmeri i lotu long tumbuna bilip bilong ol.

“Sapos mama, papa o brata susa i dai ol liklik pikinini i no ken save.

“Sapos ol stap long haus kra na save ol i bilip spirit bilong dai man o meri bai go insait long ol na bagarapim ol na komyuniti wantaim. Long dispela as ol liklik pikinini i mas stap longwe na i no ken save long dai bilong papamama o wanpela memba bilong famili.

“Ol bikpela manmeri tasol i mas stap na planim bodi,” em i tok.

Em i tok wantaim dispela bilip, ol i save yusim long politik, edukesen, helt, wok gaden, jeneral sosel wok na relijen.

Long dispela tumbuna bilip, Pater Garuai i tok husat i kamap Kristen, dispela pasin i strongim Kristen bilip bilong ol.

Em i tok ol manmeri i gat bikpela rispek pasin.

Ol manmeri na moa yet ol meri i ken wokabout fri long nait. No gat wanpela man bai bagarapim ol.

“Pasin edukesen bilong ol tu i bikpela.

“Mak bilong ol lain husat i go long skul i bikpela.

Long ol salens, Pater Garuai i tok planti bilong ol i gat tumbuna bilip na i hat long ol i kisim pasin bilong skul.

Pater Garuai wantaim ol narapela brata Kristen bilip i traim hat long pulim ol long bilip long God Triwan, Papa, Son na Holi Spirit.

“Sapos wanpela bilong ol i

joinim wanpela Kristen sios olsem Katolik ol arapela memba bilong famili bai joinim ol arapela sios olsem Angliken, Luteran, SDA, Jehova o AOG.

“Olgeta wantaim i no ken joinim wanpela sios tasol.

Ol save lukim husat sios i save givim yunifom em ol i save joinim. Dispela em long soim ol i narapela.

Long ol misineri bilong Sosaiti ov Divain Wod (SVD) i gat inap olsem 20 i wok long Zimbabwe.

I gat ol arapela rilijes Oda o sosaiti tu i stap long Zimbabwe olsem Marianhill, Franciscan Capuchin (OFM Cap), Oblates na Jesuit.

Askim sapos Pater Garuai i misim ples, em i tok sampela taim yes. Em i laik tok ples o tok pisin liklik tasol no gat wanpela wantok i stap klostu bai em i inap long toktok wantaim.

Em i tok wok misin i gutpela tasol wanpela i mas redi long bungim ol salens na ol senis i kamap.

“Sapos tingting bilong wanpela i no op, em bai hat long em i bungim ol salens na senis i kamap long komyuniti we em i wok long em,” Pater Garuai i tok.

Garuai i bilong Rorovana ples, Arawa long Atonomos Rijon bilong Bogenvil.

Mama i karim em

paslain long 6-pela pikinini we i gat 4-pela man na tupela meri.

Taim em i liklik yet, em i gat tingting long kamap wokman bilong God tasol disisen bilong kamap olsem i no kamap hariap.

Pastaim long dispela bihain long em i pinisim Gret 12 long Sogeri Nesenel Haiskul em i go wok wantaim Papua Niugini Benking Kopresen (PNGBC) nau Benk Saut Pasifik (BSP) long Goroka, Isten Hailans.

Bihain long dispela em i go long SVD novisiet haus long Rabihamul, Westen Hailans.

Long 1991 em i stadi long Holi Spirit Tiolojikel Institut, bipo Holi Spirit Meja Seminari na skul pater inap long em i kisim blesing long kamap pater long 1998.

Em i tok famili bilong em i amamas long em i kamap wokman bilong God na ol i amamas long em i go wok misineri.


Dispela ripota i save long Pater Garuai long 1991 i go inap long 1993 taim tupela i stap sumatin long Bomana Seminari.



Pater Alex Garuai, SVD



Toro



Biabia



Kanage



Mi ting olsem...  
**Autim Tingting**  
 Teks... Teks... Teks...  
 Teks i kam long 71845906

Dia Edita, mi gat wanpela tingting tasol. Tingting bilong mi i olsem, mi save lukim ol polisi i save kam na ranim ol buai lain husat i save maket aninit long dispela flai ova bris long Erima. Ol polis i save traime bes bilong ol long mekim dispela hap i luk klia na i gutpela long ai bilong ol turis, forenas, o yumi yet ol PNG tasol ol dispela lain i no save harim tok. Ol i save kam bek na salim buai na bagarapim dispela hap na i mekim ol lain i no save laik kam long dispela eria, rot tu i liklik na ol kar i no hap long ran gut bikos ol teksi na ol arapela kar tu i save pakim kar nating nating long sait. Inap ol NCDC, polis o gavman i mekim sampela samting long dispela bikos em i luk nogut stret? Tenkyu.

Konsen sitisen

Mi gat wanpela tingting tasol mi laik autim long yupela ol Wantok Niuspepa lain. Em i olsem, mi save lukim na harim planti stori ol i save toktok long stil man o stil pasin na ol arapela. Yumi kolim yumi yet olsem Kristen kantri tasol pasin bilong mipela i no bihainim dispela nem 'Kristen.' Pasin bilong korapsen, pasin bilong stilim kar o stil, pasin bilong pik poket, pasin bilong kilim man, pasin bilong kros, pasin bilong tokbaksait, olgeta dispela samting em i no stret. Yumi mas bihainim lek mak bilong Bikpela bilong yumi, em papa God tasol i as bilong olgeta samting. Yumi mas laikim wanpela narapela olsem God yet i laikim yumi. Yumi mas i gat dispela pasin Laikim (love) i stap insait long lewa bilong yumi wan wan na yumi mas lusim olgeta dispela pasin nogut na kam long Papa God tasol. Dispela i ken soim ol arapela brata susa bilong yumi olsem yumi tru tru Kristen kantri na ol bai laik long kam na lukim kantri bilong yumi. Tenkyu tumas.

Merisol

# NBC TV bai ranim nupela TV drama bilong Japan

STAT long neks wik, ol pipel bilong PNG bai lukim wanpela nupela televisen drama siris o program long laip long Japan.

Oshin em nem bilong dispela nupela TV drama siris bai kamap long NBC TV stat long neks wik Mande.

Embasi bilong Japan long Pot Mosbi i tok NBC TV i wok bung wantaim Japan Faundesen na NHK long kamapim dispela drama long ol lain i save lukim TV long PNG.

Dispela drama ya i stori long laip, famili na wok bilong wanpela meri nem bilong em Oshin na ol samting i kamap long las senseri, em 20th senseri.

Japan Embasi i tok planti lain long wol i laikim laip stori bilong Oshin long dispela TV drama siris na em i bilip olsem ol lain tu long PNG bai glasim, skelim na laikim, moa yet long laip na kalsa namel long tupela kantri.



kamap long wanpela tarangu fama famili husat i go aut painim wok taim em i liklik meri stret- wantaim 7-pela krismas. Papa bilong

em i bin salim em i go wok olsem sevan o haus gel long narapela famili. Long hatwok bilong em yet,

marit laip, dai long pikinini meri bilong em na komitmen long man bilong em long woa na kilim em yet long pinis bilong woa, na bi-

hain we gutpela samting i painim taim em i kamap founda na mama bilong wanpela supamakem bisnis, drama TV stori i autim histori bilong Japan long dispela taim.

Em i gat moa long stori bilong wanpela meri Japan, tasol em i stori bilong Japan olsem wanpela kantri yet.

Namba wan na namba tu episod o hap bai save kamap long 7.30am na 7.45 moning long Mande na skruim i go long 8.30 moning long Tunde inap long Fraide. Ol bai soim gen ol program long Sande, 11 klok moning.

Embasi bilong Japan long PNG i bilip olsem taim ol i lukim dispela TV program bilong Oshin, ol pipel long dispela kantri bai lukim na lainim sampela gutpela samting long laip na kalsa bilong Japan.

Long wankain taim tu, Embasi i tok dispela bai skruim gutpela wok pren namel long Japan na ol pipel bilong PNG.



STORI BILONG TUMBUNA

OL I KAIKAI LIKLIK SNEK

Bipo tru i gat tupela susa i stap long saut Kambia klostu long Westen Hailans provins. Nem bilong tupela susa em Kewa na Palt.

Kewa em i nem bilong man na Palt em i nem bilong meri. Papamama bilong tupela i bin indai pinis long taim bilong pait wantaim tupela lain insait long Saut Kambia tasol.

Tupela susa i sindaun gut tru na i no gat pait na kros namel long tupela. Oltaim Kewa i kamautim kaukau na kukim na givim Palt. Na kain kain wok insait long haus o ausait long haus Kewa tasol i mekim bilong Palt i amamas long em.

Kewa i bin putim Palt insait long hul bilong mambu klostu tasol long haus bilong tupela. Long tingting bilong Kewa i tok mi no laik salim yu i go long maritim wanpela man. Kewa i go long gaden bilong kamautim kaukau na Palt i kamaut long mambu na wokim sampela rop long bus.

Nau taim bilong Kewa i kam bek long haus, kwik taim tumas Palt i kisim rop em i bin wokim pinis na i go insait long hul bilong mambu.

Kewa i kam long haus, brukim pa-iawut, mekim paia, kukim kaukau na taim kaukau i kuk pinis em i singautim Palt na givim kaukau. Tupela i kaikai pinis na tudak i kamap na tupela i go slip.

Na long moningtaim Kewa i go long gaden gen bilong kamautim kaukau. Palt i stap long haus na em i wokim rop gen na tingting, bilong em i tingting long maritim man. Olsem em i taitim dispela rop em i bin wokim pinis long banis klostu long haus bilong tupela na taim i go i go kamap long hap bilong Kiripia insait long Tambul eria.

Insait long Kiripia em i go na maritim wanpela man em i save kaikai binatang i stap insait long graun. Nem bilong dispela man em Kagul Kalua.

Kalua i save moa long liklik snek i stap long graun. Na liklik snek i stap insait long graun em i kaikai tru bilong pipel bilong Kiripia.

Na taim Kewa i kam bek long haus na kukim kaukau pinis na bihain em i singautim Palt long kaikai. Tasol Palt i no slip i stap insait long mambu.

Man, бага Kewa i no save Palt i go we. Kewa i wok long painim em, tasol em i no painim. Na tudak i kamap na em i go slip. Moningtaim tru Kewa i sindaun long haus na em i kra i long susa bilong em i go we.

Em i lukim rop Palt i bin taitim long banis klostu long haus bilong tupela na em i wok long bihainim rop i go long namel samting, tudak na em i go bek na slip.

Long moningtaim tru em i go waswas long wara na bihain em i kam bek long haus, i bilas gut tru na i stat long rot i go Kiripia.

Insait long haus em i lukim wanpela pikinini kandere bilong em i stap. Dispela susa bilong Kewa tasol i bin karim.

Na liklik bebi boi i tok, kandere, yu kam hia. Kewa i tok yesa, kandere mi kam. Orait, tupela i stap na Kewa i askim liklik boi, papamama i go we na boi i tok tupela i go painim kaikai long gaden. Olsem na tupela kandere i wet i stap long haus.

Nau papamama i go kamap long haus, tupela i tok gut de long Kewa. Kewa i lukim tupela karim planti mambu pulap long liklik snek i stap insait long graun wantaim planti kumu.

Palt wantaim man bilong em Kagul Kalua tupela i kukim ston na mumuim ol liklik snek. Kewa i tok long em, ol dispela liklik snek.

Pastaim long tupela manmeri i mumuim ol kaikaim, Kewa i tok mi no save kaikai ol i save mumu long en. Mi save kaikai kaukau ol i save kukim insait long sit bilong paia. Olsem na Palt i kukim sampela kaukau long paia na givim em. Kewa i kaikai sampela tasol na sampela em i haitim i stap.

Nau tupela manmeri i rausim ol kaikai pinis ol i bin mumuim pinis long en. Ol i rausim pinis tupela i katim na givim hap long Kewa. Palt na Kalua i ting Kewa i kaikai. Em i gi-aman tasol na kaikai kaukau em i bin putim. Na tromoi dispela hap liklik snek i go ausait long haus.

Bihain long kaikai bikipela ren i kamamp na Palt i go ausait na em i lukim liklik snek Kewa i bin tromoi i go. Palt i tok isi tasol long man bilong em (Kalua) long Kewa i no kaikai dispela hap liklik snek. Nau tudak i kamap na ol i go slip.

Long moningtaim Palt i askim Kewa, olsem yu stap long haus o yumi go long gaden? Na Kewa i tok em i laik go. Olsem ol i go kamap long gaden ol i save kamautim liklik snek insait long ston.

Na Kewa i stap long wanpela as bilong diwai na Palt na Kagul Kalua i lusim Kewa na i go pinis long haus. Na Kewa i no gat wei bilong go painim painim rot. Olsem Kewa i lus long dispela hap.



PAINIM WOD PILAI

Table with 4 columns: Ol wod lista, MAUS, YAKABOR, KONTRAK, ABRISIM, OSTERYLA, PILAI, NOGUT, MEMEIM, SIRSEN, KAPARESA, APINUN, TAIPRAITA, PULBOT, BILONG, WOKMERI, SKRUIM, ENGLAN, RAUNWARA, PRENIM, MERI, DOKTA

OTFAEAFDTPRCYTHEBUNDBHNPNSJUOSIESWNRSLSGEEUHPPEDCYCOOUCGROETMHBILONGAJLPTIFRHSLOWAWENDNIKSI SNTFOUBNLSGSDSOJNFDTFWEPPIKWSXLIQEOEAESNSEIRHUPAGANERTOBIMP MHTYRMALVTRRLADPBMDIUVOAAS IPEONHTEMTBTDYURMNKNITAJE ECGOTKISGEUSGHCIVTIYIMBHM USPTTYDNDGPOSSOOSNRKANAFXSLTGSEGEEOFAIMWHIEARKWBCXLESERAIIPNKCMEIMEIRPAALPEMQVUFFLZHQTQPXWK TICUBZRMDCGNIFJASEAESJRONAGYNOIIEE DAXIEHTSIPSCWOTNPYWRNF OOA JEUKEEUSTOMEKNAISA AEFDTGG KQEVMAEBNCYAFLOSTERYLAZYP JSTEMTRETLLAGCRHTPAEICWEN IPPSUOMTYFBNGLU EMSIRSENZQ ARHOGSBCLMERIZHP COPILAI CE

Ansa bilong Wod Pilai isu 2196

ORASHTTEVMAGDEUROTAUKAENR TFQHTINISWRTMHFMSMAYTUGWSG AYELSPATINGMISLAINTE RR LR T AYOAEJSRFP E J N T O T A I E N I B K A A EHISALROSZUQIOMVOMLUTERAN UIMONLFAASALTEEENGENAOUWGTN J L H B E P S E A R A Q S H A D M S M R N C I F O L J T C A D A E F I A P O E G M I U O I G L R A U S A F F D I I C O N K L I H D V T T T J U B N D C U C S O T H N S D G P P Y C O P U L O P T E R G T I I J E R E F O M A U G U S A B P A D A D T A M I F E S N I S M M I E W F S H R H E M R I E E L F E K M B Q R A C K N A E S F E N F L L A T N N Q N H V E N A W R I C T I F Y I O H T A S I I R R Y A S V Q H T V S C X E Z X T F Q I H C N V M S O R C Z D B X E E D Y I A T T E S I O N W M A K E T L O V E S Y R O B N O O C J O O K S Y I O M L W E R D E A E G E C F N G E I J A D S R V N N P T T B N I G B A C F R R R E S H Q E E E I T G I O I C O D E C E P E R I A A D O I S M D G Q E V L R I P L D



# Contempt of Court keis egensim PNG gavman go long kot

Sam Seke i raitim

LOYA bilong ol refuji na asailam sika long Manus Ailan, Ben Lomai, i putim wanpela aplikesen long Nesenel Kot long Pot Mosbi asde egensim gavman long Contempt of Court - o i no bihainim oda bilong kot.

Dispela i bihainim oda bilong Suprim Kot Epril 26 long keis we Oposisen Lida bipo, Belden Namah i bringim ap na ol i rulim olsem em iligel long putim ol asailam sika long Manus Ailan.

Long Septemba 29, Mista Lomai i bin mekim aplikesen tu long long Suprim Kot i mas lusim ol dispela lain.

Em i tok dispela aplikesen i karamapim tu sait long



PNG Loya Ben Lomai na wanpela asailam sika em i helpim long Manus.

kompensesen kleim bilong ol refuji na asailam sika.

Mista Lomai i tok narapela aplikesen em i mekim long Suprim Kot we i egensim

toktok bilong gavman olsem em i no gat rait long sainim aplikesen bilong ol asailam sika long strongim ol rait bilong ol.

# Enga polis i arestim tripela long kilim dai mama na tripela pikinini

Sam Seke i raitim

OL polis long Enga Provins i bin arestim pinis tripela man long kukim haus na kilim dai wanpela mama na tripela pikinini taim ol i slip long nait.

Tasol Ekting Provinsal Polis Komanda, Epenes Nili i tok ol polis i wok long

painim yet tripela moa saspek wantaim namba wan saspek long dispela keis.

Sif Inspeta Nili i tok ol bai sasim ol dispela lain long "wilful murder" na "attempted murder" tu long wanem wanpela long ol we i slip long haus tasol i no bin dai.

Em i tok ol polis i save long dispela praim saspek

na i apil long ol pipel long komyuniti long helpim ol polis long arestim em na ol narapela.

Mista Nili i tok dispela kain pasin long kukim haus taim ol pipel i slip insait em i nupela, na i brukim ol tumbuna pasin long kilim dai long Enga na PNG Hails na i kam inap nau.

# Care Vanuatu ranim save na daunim disasta

Sam Seke i raitim

Planti komyuniti long Vanuatu nau i gat save long wanem samting ol bai mekim long taim bilong disasta o birua.

Dispela em bihain ol i bin stap insait long wanpela trening woksop we Care Vanuatu International i bin ranim ol i kolim long Disas-

ter Risk Reduction and Climate Change Adaptation (DRR & CCA) programs.

Care Vanuatu i bin lukim ol bagarap na hevi we Saiklon Pam i bin kamapim long Vanuatu long 2015 na em i bin lukim olsem i gat nid long holim woksop na givim save long ol pipel na ol i ken redi gut taim trabel i kamapim gen.

Long las Fonde we i luksave International Day of Disaster Risk Reduction, Care Vanuatu i bin holim wanpela woksop long Tanna long Tafea Provins.

Matha Paulkon em siameri bilong Aniwa Ailan Komyuniti Disasta Komiti i tok dispela trening bai helpim gut komyuniti lonmg redim ol yet long taim bilong disasta.



Tilim ol rilif saplai long Aniwa Ailan long taim bilong bikpela san long 2015 long Vanuatu.

# MSG i no ken mekim ekskius long stopim Wes Papua kamap ful memba



Wanpela reli we ol i bin holim long sapatim Wes Papua long MSG miting long Honiara.

Sam Seke i raitim

PALAMENTERI lida bilong Solomon Islands in Solidarity for West Papua na MP bilong Wes Makira, Derek Manuari, i tok ol Melanisen lida i no ken yusim teknikel ekskius long blokim Wes Papua i kamap ful memba bilong Melanisen Spiahet Grup o MSG.

Mista Manuari i tok Wes Papua i mas stap insait long MSG na ol i ken gat vois o

maus long toktok long ol samting i karamapim ol.

Em i tok moa olsem ol pipel insait long ol Melanisen kantri na ol arapela ailan kantri tu i sapatim rait bilong ol pipel long Wes Papua long kamap wanpela indipenden kantri bikos aninit long Indonesia, em i stap long planti hevi.

Em i tok tu olsem Indonesia i no wanpela Melanisen kantri na em i mas lusim MSG.

Em i tok as we Indonesia i stap insait long MSG em long

blokim United Liberation Movement for West Papua long kamap ful memba.

Em i tok dispela em i soim long ples kliia rot we Indonesia i kontrolim tupela Fiji na PNG gavman long isu bilong Wes Papua i kamap ful memba bilong MSG.

Mista Manuari i tok United Liberation Movement for West Papua i mas kamap ful memba, wankain tu long fo FLNKS bilong Frens teritori bilong Nu Kaledonia.

# Vanuatu Meri senta askim media long helpim stopim vailens

Sam Seke i raitim

VANUATU Women's Senta i nau i stat wok wantaim ol nius media long kantri long karimaut awenes long ol rait na ol samting i karamapim ol meri long Vanuatu

Bilong statim dispela wok, Vanuatu Women's Senta i bin holim wanpela woksop long Port Vila las wik.

Het tok long dispela wokshop em "Taim bilong yumi long senisim stori."

Kodineta bilong Vanuatu Women's Senta, MarilynTahi, i tok ol i yusim dispela hap tok long wanem ol i statim ol wok long stopim vailens egensim ol meri long Vanuatu long 1992. Tasol i kam inap nau, dispela hevi i stap yet na i wok long go antap moa.

Misis Tahi i tok bikpela wok i stap long lukim olsem vailens egensim ol meri na ol kain kain pasin nogut egensim ol meri ol i pasin nogut, na i mas stop.

Em i tokim niusman Moses Steven long wanpela intaviu olsem, ol nius media long Vanuatu i ken helpim long givim aut ol dispela toktok long daunim dispela pasin nogut long ol meri.

# Ol bai bihainim gutpela wok RAMSI i mekim o nogat

Sam Seke i raitim

WANPELA bikpela samting i kam aut kliia insait long wanpela bung wantaim ol meri, ol bikman long gavman, polis, RAMSI na Pasifik Ailan Forum em olgeta i luksave long gutpela wok RAMSI (Rijinol Asistens Misin long Solomon Ailan) i mekim long stretim etnik hevi o hevi namel long ol tupela grup insait long Solomon Ailan.

Pablik Afeas na Media

Menesa bilong RAMSI, Johnson Honimae i tok insait long wanpela bikpela bung bilong ol meri i bin kamap long dispela wik. Ol i toktok long wanem samting ol i mas redi nau long mekim taim RAMSI i lusim Solomon Ailan long mun Jun, 2017.

Nesenel Wimens Samit long Pis na Sekyuriti em dispel bikpela bung i kamap long Honiara long dispela wik we i lukim ol meri lida, olgeta Pemenen seketeri, ol

het bilong ol gavman ejensi, ol provinsal polis komanda na ol bilong olgeta gavman dipatmen.

Mista Honimae i tok olgeta i amamas long wok bilong RAMSI, stat yet long yia 2003 i kam inap nau, na ol i wari olsem taim RAMSI i lusim SI, sampela trabel bai kamap.

Tasol ol bikman i bin stap long bung i tok polis i redi i stap sapos i gat trabel na tu, ol bai askim Australia long helpim ol gen.

# Boko Haram i larim 21 meri i go fri

OL i bin wet inap tu na hap yia. Tasol ol famili i no givap, ol i harim stori olsem i gat bikpela lain long wol i traim helpim na kisim bek ol pikinini meri bilong ol. Bilip bilong ol tu i strong na las wik Sande sampela famili bilong Naijeria i bungim gen 21 pikinini meri bilong ol bihain long ol lain Boko Haram i larim ol i go fri.

Boko Haram em wanpela han bilong ol lain Islam militen grup. Long Epril 2014, ol i bin holim na kalabusim klostu 300 skul meri long ples Chibok long not-is Naijeria. Planti lain long wol i bin mekim strongpela toktok tru egensim Boko Haram na traim long kisim bek ol dispela pikinini meri. Wanpela bilong ol em Michelle Obama, meri bilong Presiden

Barack Obama bilong USA. Ol Boko Haram i bin larim ol dispela meri i go fri long las wik Fonde na gavman i kisim ol i go long biktaun Abuja where ol dokta i sekap na toktok wantaim ol. Tsambido Abana, wanpela komyuniti lida bilong Chibok i tok sampela meri i lusim skin olgeta bikos ol i bin sot tru long kaikai.

Ol famili bilong ol dispela meri i bin ran long kar moa long 500 mail long rot i nogut na ol i mas stop long ol ples we ami i sekap long ol. Ol i holimpas ol pikinini bilong ol na krai na amamas wantaim long wanpela lotu long Sande moning.

Ol pipel bilong Naijeria i bin amamas long taim ol i harim nius bilong dispela 21 meri. Dispela nius i apim tu

nem bilong Presiden Muhammadu Buhari bilong Naijeria.

Abana em i papa bilong wanpela bilong ol dispela meri. Em i tok em i wari bikos ol politisen bai i traim long yusim dispela samting long pilai politik.

"Pikinini bilong ol pipel em i no mani, o ol klos yu putim long kempen. Pikinini em i samting bilong amamas," em i tok.

I no gat tok klia i kamap long ol dispela skul meri. Planti bilong ol i kamap meri bilong ol dispela lain teroris grup na ol i wokim ol pasin nogut long ol. Ol i bin Kristen tasol ol Boko Haram i fosim ol long kamap Muslim.

Long wiken, ol komanda bilong Boko Haram, husat i bin pait inap 7-pela yia wan-



Ol famili memba i amamas long spesel lotu long Abuja long Sande bihain long ol i bungim gen ol pikinini meri ol lain Boko Haram i bin holim kalabus.

taim gavman bilong Naijeria, i tok ol i larim ol dispela meri i go fri long soim olsem ol i gutpela lain. Ol i tok bai ol i larim moa meri i go fri sapos gavman i givim ol mani na i larim ol kalabus Boko Haram i go fri tu.

"Ol i larim ol dispela 21 meri i go fri bikos ol i laik gavman i save olsem Boko Haram i holim 83 moa skul meri bilong Chibok i stap," Garba Shehu,

mausman bilong Buhari i tokim Reuter Nius.

Dispela grup i tok ol i redi long toktok sapos gavman i tok orait long sindaun wantaim ol."

Planti bilong ol dispela meri i bin ranawe bihain long Boko Haram i holim kalabusim ol. Ol i painim wanpela meri long bikbus long mun Me. Ol i ting Boko Haram i holim 190 meri i

stap yet.

Boko Haram em i wanpela han bilong Islamik Stet tasol sampela mun i go pinis, ol i rausim olpela lida Abubakar Shekau. Shekau i sot long ol sapota na ol samting bilong pait, na em i holim ol dispela meri i stap yet.

Ol lain bilong Red Cross na Swiss gavman i bin go pas long ol toktok bilong larim ol dispela 21 meri i go fri.

## Presiden Santos i skruim taim bilong stopim pait



Presiden Juan Manuel Santos: Taim i sot nau long painim bel isi na gutpela sindaun.

PRESIDEN Juan Manuel Santos bilong Kolombia i tokaut olsem bai em i skruim taim bilong stopim pait wantaim bikpela rebel grup bilong kantri, Farc. Em i mekim olsem long givim moa taim long sevim ol toktok bilong bel isi namel long gavman na Farc. Ol pipel bilong Kolombia i bin vot egensim dispela tingting bilong gavman long painim bel isi wantaim Farc.

Presiden Santos i bin tok-tok long televisen olsem em i skruim taim i go long tupela mun long stopim pait wantaim Farc inap 31 Desember.

Em i tokaut long dispela plen bihain long em i bungim ol studen husat i go pas long ol protes long kantri. Ol i laik bel isi i mas kamap nau na pait i mas stop, maski sapos ol pipel i bin vot egensim dispela tingting.

"Mi mas tok klia olsem dispela i no paim rot," Santos i tok. Em i bilip bai ol

inap long wanbel long wanpela agrimen bipo long dispela yia i pinis. Em i tok sapos i no gat woa bai laik bilong ol soldia na ol rebel tu bai i no inap long bagarap.

Santos i winim Nobel Prais bilong dispela yia. Em i wok long toktok wantaim ol lain Farc na ol lain bilong oposisen long painim rot bilong stretim ol toktok we moa pipel long kantri i ken sapotim.

Olpela presiden, Alvaro Uribe, husat i go pas long ol oposisen long dispela toktok, i laik lukim ol bikpela senis, olsem bikpela moa mekim save long ol rebel husat i kamapim ol woa kraitim.

Ol rebel husat i no inap kalabus aninit long dispela plen, i tok ol i no laik senisim ol samting na rausim hatwok ol i bin mekim inap long foapela yia long painim rot bilong stretim dispela hevi.

## Bob Dylan i winim Nobel Prais

WANPELA singa na man i save raitim ol song, Bob Dylan bilong Amerika, i winim 2016 Nobel Prais bilong Literetsa. Dispela em i namba wan taim long wanpela song raita i winim dispela bikpela literetsa prais tru long wol. Oltaim dispela prais i save go long ol man o meri i raitim ol buk o poetri.

Ol i givim Bob Dylan dispela prais long "kamapim

nupela poetik ekspresen insait long pasin bilong ol song bilong Amerika."

I tru i gat planti ol arapla song raita bilong Amerika i raitim ol song em planti lain i ting i olsem poetri, tasol Dyan em i namba wan man long winim dispela prais long ol song bilong em.

Dylan long studio long 1965.



## Skotlan i no bihainim UK

NICOLA Sturgeon i tok sapos gavman bilong Yunaitet Kingdom (UK) i strong yet long Brexit, em bai lukim olsem UK i brukim ol promis em i bin mekim long taim ol pipel bilong Skotlan i bin vot long independens. Em i tok dispela i ken kirapim tingting bilong ol pipel bilong Skotlan long vot long kamap wanpela independen kantri.

Fes Minista bilong Skotlan i tok long mun i kam bai em i painim ol nupela lo bilong helpim Skotlan long stap long singel maket, maski sapos UK i laik lusim.

Em i bin mekim dispela toktok long miting bilong ol SNP long Glasgow long Sarere.

Em i bin mekim dispela toktok bikos em i no ama-



Nicola Sturgeon i tok Skotlan i "op long bisnis" bihain long Brexit vot.

mas long ol toktok bilong Prais Minista Theresa May bilong UK.

"Sapos Tory gavman i tok no gat long ol dispela samting, sapos em i pulim Skotlan i go daun long rot we ikononi bai bagarap, ol wok bai sot, daunim gutpela sindaun bilong mipela na bagarapim gutpela nem bilong mipela, orait Skotlan i mas gat rot bilong painim

gutpela sindaun long bihain taim.

"Na bai lukim olsem Skotlan i gat dispela sans. Na yumi mas klia gut long dispela. Sapos dispela taim i kam, em bai bikos ol i brukim ol promis ol i bin mekim long Skotlan long 2014."

Ol toktok bilong Sturgeon i bin kamap bihain long mausman bilong praim minista i

stopim ol plen bilong em long tokaut long lo bilong vot gen long kisim independens long narapela tupela yia. Ol i tok SNP i mas soim rispek long risal bilong vot.

Sturgeon i tokim dispela miting, "I gat planti vota husat i bin tok nogat i lukluk nau long dispela Brexit vot na i ting ating independens em i rot Skotlan i mas bihainim."

**SIAMAN bilong PNG Sustainable Development Program Limited (PNGSDP), Sir Mekere Morauta, i tok Gavman bilong PNG i wok long mekim ol samting isi isi long stretim toktok wantaim PNGSDP long Hai Kot bilong Singapore.**

Sir Mekere i tok long las wik, ol loya bilong PNGSDP na Gavman i bin kot long Singapore na toktok bilong ol loya bilong Gavman i no soim wanpela gutpela as long sekim ol buk bilong PNGSDP.

Em i tok ol loya bilong Gavman i wok long mekim ol samting isi isi na tu ol i wok long tanim toktok i go kam.

“Mi bilip olsem mipela bai win. PNGSDP bai winim dispela kot long Singapore. Ol loya bilong mipela i wok long toktok stret long wanem samting gavman i rong na ol samting we mipela i laikim long en,” Sir Mekere i tok.

Sir Mekere i tok ol loya bilong Gavman i no toktok stret na toktok bilong ol i paul nabaut.

“Dispela i soim olsem PNGSDP bai win. Mi bilip strong olsem,” Sir Mekere i tok.

Long las wik opis bilong Atoni Jeneral i bin tok Gavman bilong PNG na PNGSDP bai go bek gen long Hai Kot long Singapore.

Opis bilong Atoni Jeneral i tok ol loya bilong Gavman i strong yet long askim kot long givim tok orait na kot oda long larim Gavman i

sekim ol buk o fainensel ripot bilong PNGSDP.

Opis bilong Atoni Jeneral i tok ol loya bilong Gavman i wok long bihainim edvais bilong Gavman na ol i toktok gut long larim gavman i sekim ol buk bilong PNGSDP.

PNGSDP i les long Gavman i sekim buk bilong ol bihain long Gavman i bin tekova long Ok Tedi Maining long Westen Provins long yia 2012.

Taim Peter O’Neill i kamap Praim Minista, Gavman i bin tekova long OTML long yia 2013.

Dispela i lukim ol bod na menesmen bilong kampani i senis na namba wok manmeri bilong kampani tu i go daun.

Dispela i lukim Gavman i putim wanpela nupela lo long Palamen long mun Septemba 2013.

Nem bilong dispela loa em ol i kolim 2013 Ok Tedi Mining Tenth Supplemental Act. Dispela lo i rausim 63.4 pesen seaholding bilong PNGSDP long OTML, na larim Gavman i tekova long dispela sea long OTML.

Sir Mekere i tok dispela pasin bilong Gavman long kamapim dispela lo em long givim pawa long Gavman long senisim straksa bilong bod na menesmen bilong OTML, na givim pawa long kontrolim Long Tem Fan.

“Dispela lo i givim pawa long Praim Minista i ken kontrolim kampani na

mekim disisen long givim kompensesen mani long PNGSDP na arapela samting long dispela,” Sir Mkere i tok.

Em i tok as tru bilong tupela PNGSDP na Gavman i go long kot em long askim Hai Kot long Singapore sapos dispela pasin bilong Praim Minista O’Neill na Gavman i stret aninit long kampani lo bilong Singapore bikos PNGSDP em i kampani bilong Singapore.

Praim Minista O’Neill i tok Sir Mekere i bin stap Praim Minista taim em inap long kotim BHP Billiton long bikpela bagarap em i bin mekim long Fly Riva tasol Sir Mekere na Gavman bilong PNG long dispela taim i bin larim BHP i abrusim kot.

Dispela i bin lukim BHP Billiton i kamapim PNGSDP long Singapore na kamapim Long Tem Fan olsem kompensesen mani bilong givim long ol manmeri long Westen Provins we kemikel na marasin nogut bilong Ok Tedi Main i bin bagarapim ples bilong ol.

BHP Billiton em i pastaim opereta bilong Ok Tedi Main na ol kemikel na marasin no gut olsem pipia bilong main ol i kapsaitim long Fly Riva i bin bagarapim bus, graun na wara long Westen Provins.

Praim Minista O’Neill i tokim ol pipel bilong Westen Provins olsem ol i ken kotim BHP Billiton long dispela bagarap em i bin mekim bipo.

# PNGSDP na Gavman i kot yet long Ok Tedi main



Wol klas Ok Tedi kopa main long Westen Provins.

## PNG manmeri yet ken ranim LNG Projek

OPERETA bilong PNG LNG Projek, ExxonMobil PNG, i amamas long wok ol manmeri PNG yet i mekim.

Menesing Dairekta bilong ExxonMobil PNG, Andrew Barry, i apim nem bilong ol wok manmeri bilong PNG husat i wok long PNG LNG Projek bikos em i lukim olsem ol yet i ken ranim dispela bikpela LNG Projek.

Mista Barry i tok pasin bilong lainim ol samting em wanpela namba wan samting na manmer PNG i save

lainim ol samting hariap.

Maski LNG em i wanpela nupela samting long kantri, ol manmeri PNG i wok long mekim planti gutpela wok na ExxonMobil i glasim olsem ol manmeri PNG yet bai fit long ranim kain ol bikpela wol klas LNG projek long bihain taim.

“Ol prodaksen na mentenens treni teknisen i mekim wok gut tru stret. Dispela i mekim mipela i gat strongpela bilip long wok bilong ol,” Mista Barry i tok.

Long wankain taim, Menesing Dairekta bilong Oil Search, Peter Botten, tu i apim nem bilong ol wok manmeri bilong PNG husat i wok long Oil Search.

Mista Botten i tok wok manmeri bilong Oil Search em i ‘wol-klas’ na ol i fit na strongpela manmeri PNG i wok long apim level bilong kampani.

“Mipela i gat sampela wol klas manmeri i stap long kampani bilong mipela,” Mista Botten i tok.

## Kina winim kontrak long Nasfund

KINA Securities Limited (KSL) i tok fan edministresen divisen bilong em i winim kontrak long givim fan edministresen sevis long National Superannuation Fund (Nasfund).

Total aset o ol samting bilong Nasfund olsem propeti na invesmen i abrusim pinis mani mak bilong K4.09 bilien.

Nasfund i save lukautim na menesim ol sevis mani bilong moa long 543, 000 memba o manmeri long PNG.

Sif Eksekutiv Opisa (CEO) bilong Kina Securities, Syd Yates, i tok dispela kontrak bilong givim fan edministresen sevis long Nasfund i soim olsem ol bikpela fainensel kampani insait long kantri i gat strongpela bilip long sevis bilong Kina.

“Planti nupela samting i kamap long fainensel sevis sekta long PNG, na teknoloji tu i wok long senis hariap tru taim kantri i wok long lukim planti gutpela samting i kamap long ikonomi,” Mista Yates i tok.

Kina i gat bikpela bilip long givim gutpela na namba wan fan edministresen sevis i go long ol pipel bilong PNG, Mista Yates i tok.

Em i tok stat long yia 1988, Kina i bin givim fainensel sevis long PNG na nau em i wok long bihainim ol teknoloji long kirapim nupela samting long mekim wok bilong lukautim mani i kamap isi.

“Mipela i lukluk go het long strongim dispela patnasip wantaim Nasfund na givim namba wan fan edministresen sevis i go

long ol memba bilong Nasfund,” Mista Yates i tok.

Sif Eksekutiv Opisa (CEO) bilong Nasfund, Ian Tarutia, i tok ol i givim kontrak bilong fan edministresen sevis i go long Kina bikos ol i gat ol samting bilong mekim wok olsem nupela teknoloji na ol nupela sistem long mekim kain ol wok.

“Mipela i wanbel long nupela teknoloji na sistem bilong lukautim ol fan o mani bilong ol memba. Kina i gat dispela nupela teknoloji. Dispela i mekim mipela i bilip strong long sevis ol i ken givim long Nasfund,” MistaTarutia i tok.

Ol memba bilong Nasfund em ol wok manmeri long praivet kampani, stet-on entaprais (SOE) o kampani bilong gavman, ol statuteri atoriti, na arapela ol manmeri husat i save ranim bisnis bilong ol yet.

Dispela kontrak Nasfund i givim Kina i mekim Kina i kamap namba wan suparenuesen fan edministreta o kampani bilong lukautim ol sevis mani bilong ol memba bilong suparenuesen fan olsem Nasfund o Nambawan Super.

Fan menesmen brens bilong Kina i lukim namba bilong ol memba i go antap long 700, 000 memba na mani mak ol i lukautim em i K9.7 bilien.

Kina em i pablik kampani we ol i listim long Pot Mosbi Stok Eksens (POMSoX) na Australian Sekuritis Eksens (ASX).

## Mulacek apil gen long Suprim Kot long Yukon

INTEROIL Corp i tok Suprim Kot bilong Yukon teritori long Kanada i givim tok orait pinis long larim ExxonMobil i baim kampani.

Kot i mekim dispela disisen bihain long sampela seaholda i no bin wanbel long salim InterOil Corp i go long ExxonMobil.

Man husat i bin statim InterOil, Phil Mulacek, i bin kisim kampani i go long kot long Septemba 27, 2016.

Long las wik, Mista Mulacek i kisim InterOil i go bek gen long kot long apil long dispela disisen bilong Suprim Kot long Yukon.

InterOil i tok Mista Mulacek i failim pinis ol kot pepa long Suprim Kot bilong Yukon long apil long dispela disisen bilong kot long givim tok orait long larim ol bod bilong InterOil i salim kampani.

Mista Mulacek i askim kot long holim bek dispela disisen inap kot i mekim nrapela disisen bilong dispela apil na sapos em i lus, ol i ken salim kampani.

InterOil i tok em i laikim kot long hariapim ol samting na larim kot i mekim disisen hariap long dispela apil bilong Mista Mulacek.

InterOil i tok ol i wanbel long dispela dil bilong ol wantaim ExxonMobil na ol i laik salim kampani hariap.



Phil Mulacek, man husat i bin statim InterOil Corp.

## O'Neill na Marape apim nem bilong Botten

TUPELA bikpela lida bilong kantri i amamas long Harvard Bisnis Riviu (HBR) i givim luksave long Menesing Dairekta bilong Oil Search, Peter Botten.

Praim Minista Peter O'Neill na Fainens Minista James Marape i tok Mista Botten no save tingting long mekim bisnis long oil na ges tasol na kisim moa mani tasol em i gat bikpela tingting long helpim developmen bilong PNG.

Praim Minista O'Neill i tok Mista Botten i mekim hatwok insait long moa long 20 yia long apim nem bilong Oil Search na larim dispela kampani i mekim moa winmani.

"Em i apim nem bilong Oil Search, wanpela biknem oil na ges kampani bilong PNG. Na em i apim nem bilong kantri bilong yumi tu.

"Mista Botten i mekim planti gutpela samting helpim kantri bilong yumi i kirap na develop.

"Hatwok em i mekim long soim laikim bilong em long kantri bilong yumi em i winim hatwok long oil na ges bisnis em i ranim wantaim Oil Search.

"Em i mekim planti gutpela wok long senisim laip

bilong ol manmeri bilong yumi long ples.

"Mista Botten em i Siaman bilong Hela Provincial Health Authority.

"Aninit long lidasip bilong em, Mista Botten i kamapim Oil Search Foundation long helpim ol manmeri long ples i kisim gutpela edukesen na helt sevis na stap gut long ples.

"Nesanel Futbol Stadium Sir Manasupe Haus long Pot Mosbi nau i stap gut bikos Mista Botten i go pas long kamapim wanpela strongpela patnasip wantaim Oil Search na Gavman aninit long Pablik Praivet Patnasip (PPP) long mekim mentenens na kirapim gen dispela tupela bikpela samting bilong kantri.

"Nau Mista Botten i go pas gen aninit long dispela patnasip long kirapim nupela APEC Haus we ol praim minista na presiden bilong ol memba kantri bilong APEC bai yusim long bikpela APEC bung long Pot Mosbi long yia 2018.

"Em inap long stap namel long ol biknem na top 100 CEO bilong ol bikpela kampani bilong wol. Gavman i amamas long em i mekim planti gutpela samting long helpim di-

velopmen bilong PNG.

"Mi makim maus bilong gavman na pipel bilong PNG na salim tok amamas i go long em i kisim dispela luksave.

"Dipsela luksave we em i kisim bai helpim kantri bilong yumi long pulim moa investa i kam insait long mekim bisnis na kirapim ikonomi bilong yumi," Mista O'Neill i tok.

Mista Marape i tok em i makim maus bilong ol pipel bilong Hela na salim tok amamas i go long Mista Botten.

"Mi laik tok tenkyu long sevis em i givim long ol pipel long Hela taim em i apim han long kamap Siaman bilong Hela Provinsal Helt Atoriti.

"Lidasip bilong bisnis em i stap wantaim em. Mista Botten i lukautim gut Oil Search na kirapim dispela kampani i kamap wanpela biknem oil na ges invesmen kampani insait long Esia-Pasifik rijon.

"Mi wanbel long em i soim gutpela samting olsem ol yangpela bisnis lida long PNG i mas lukim dispela kain samting i bihainim bisnis lidasip stail bilong em," Mista Marape i tok.

## Bosman bilong ExxonMobil apim nem bilong PNG kampani

MENESING Dairekta bilong ExxonMobil PNG, Andrew Barry, i tok em i amamas long lukim ol kampani bilong PNG i givim gut sevis long PNG LNG Projek.

Mista Barry i tokim wanpela bung bilong ol kontrakta na saplaia long las wik olsem namba wan gas projek bilong kantri, PNG LNG Projek, i bringim planti gutpela samting long kirapim ikonomi na bisnis bilong PNG.

Institut ov Benking na Bisnis Menesmen (IBBM) i bin ranim dispela bung long Pot

Mosbi na i bin bungim ol liklik bisnis na kampani bilong mekim ol kontrak wok o givim sevis long PNG LNG Projek.

"Mi amamas tru long lukim olsem ol kampani bilong PNG i wok long mekim gutpela wok. Pefomens bilong ol i go antap," Mista Barry i tok.

Em i tok PNG LNG Projek i ran gut bikos kain ol liklik kontrakta i mekim wok na i helpim projek long ran gut.

Mista Barry i tok wankain olsem kampani, ol wok manmeri bilong PNG yet tu i wok

long mekim gutpela wok.

"Dispela em i namba wan ges projek bilong PNG, tasol ol wok manmeri i wok gut. Ol i lainim ol nupela samting na mekim ol nupela wok we bipo arapela manmeri PNG i no save mekim," Mista Barry i tok.

Em i tok PNG LNG Projek i gat moa long 2, 400 wok manmeri na 80 pesen bilong wok fos em i manmeri PNG.

"Klostu long 20 pesen em ol meri. Ol meri i wok gut long projek," Mista Barry i tok.

## Pawa karen bai sot long Lae

PNG Power Limited (PPL) i tok save pinis long manmeri olsem pawa karen bai sot long Lae siti na arapela ol ples arere long siti bikos sampela pawa lain i bagarap na ol man i wok long fiksism.

PPL i tok strong bilong kamapim pawa i sot na dispela em i narapela as bilong pawa karen i sot.

Sid Eksekutiv Opsia (CEO) bilong PPL, Chris Bais, i tok unit namba 4 long Ramu Haidro Pawa stesin i no wok na ol wokman i stopim.

Dispela i lukim pawa saplai i sot bikos dispela yunit i no moa kamapim pawa saplai.

"Antap long dispela hevi, ol pawa lain i kam long Baiune Haidro Pawa Stesin long Bulolo long Morobe Provins na long Pauanda long Westen Hailans Provins," Mista Bais i tok.

Dispela tupela hairdo pawa stesin long Baiune na Pauanda i save givim strong long pawa saplai i kam long Ramu Hydro Pawa Stesin wantaim 15 megawatt (Mw) pawa saplai.

"Baiune i save kamapim 10Mw na Pauanda i save kamapim 5Mw long saplaim pawa long Lae, Madang na Hailans senta," Mista Bais i tok.

Nau Lae i wok long kisim pawa long stend-bai disel jenereta long Taraka na Milfordhaven.

Mista Bais i tok dispela tupela pawa stesin long Taraka na Milfordhaven i save kamapim 17Mw pawa saplai tasol dispela em i no inap long bungim 38Mw pawa saplai, na dispela i wok long kamapim hevi bilong pawa karen.

# Bosman bilong Oil Search stap long top 100



Peter Botten i wok long oil fil long Sauten Hailans and Hela insait long 22 yia em i stap Menesing Dairekta bilong Oil Search.

MENESING Dairekta bilong Oil Search Limited, Peter Botten, i kisim wanpela bikpela luksave long wanpela biknem bisnis magesin long wol.

Harvard Business Review (HBR) em i wanpela biknem magesin bilong raitim ol stori bilong bisnis na menesmen.

Nambawan bisnis skul long wol, Harvard Bisnis Skul long Harvard University i save kamapim o raitim na pablisim dispela magesin.

HBR i luksave long Mista Botten olsem wanpela bilong top 100 Sif Eksekutiv Opisa (CEO) bilong ol bikpela kampani we i ran gut na mekim moa winmani.

Mista Botten i tok taim em i stap wantaim Oil Search, em i kisim planti luksave na dispela biknem oil na ges kampani bilong PNG i bringim planti gutpela samting long laip bilong em.

Planti manmeri i save ting olsem Oil Search em i wanpela oil na ges kampani nating tasol Mista Botten i tok dispela kampani em i wanpela wol klas kampani na wol i luksave long Oil Search.

Dispela em i namba tu taim HBR i givim luksave long em olsem wanpela top 100 CEO bilong bisnis long wol.

Long las yia, Mista Botten i bin kisim wankain luksave. Dispela i namba tu taim gen

long em i kisim wankain luksave.

"Mipela i gat sampela strongpela wok manmeri long Oil Search. Ol samting bilong wok i stap long ol oil na ges fil long PNG we Oil Search i operetim long en em i wol klas tu," Mista Botten i tok.

Em i tok dispela kain ol wol klas samting long wok ples i mekim em i kisim bikpela luksave na dispela i apim nem bilong kampani.

"Bikpela samting dispela i apim nem bilong PNG olsem wanpela gutpela kantri long mekim bisnis. Wol i luksave long PNG olsem wanpela skel ples long invest na mekim mani," Mista Botten i tok.

HBR i save lukim planti samting long makim ol CEO i kamap top 100 CEO bilong ol bikpela bisnis long wol.

Wanpela samting ol i save lukim na skelim em i gutpela tingting long mekim gutpela disisen long larim kampani i gro i go bikpela na mekim moa win mani.

Insait long 22 yia Mista Botten i stap Menesing Dairekta bilong Oil Search, lidasip bilong em long Oil Search i apim veliu bilong kampani ol i kolim maket kapitalaisesen i go moa long K33. 14 bilien.

Long yia 1994 taim Mista Botten i kamap Menesing Dairekta bilong Oil Search, maket kapitalaisesen bilong Oil Search i bin stap

long K7.1 milien.

Dispela pefomens em i wanpela bikpela samting we HBR i lukim long givim luksave long Mista Botten.

Narapela namba wan samting HBR i save lukim em ol gutpela samting na ol nupela samting ol CEO i save mekim long apim level bilong wok bilong kampani na strongim gutpela patnasip long sevim komyuniti.

Taim em i kamapim Oil Search Foundation (OSF), Mista Botten i strongim ol komyuniti wok long kirapim edukesen na helt sevis long ol ruel eria long PNG.

OSF i karim gutpela kaikai na wanpela hanmak bilong em, em i lukim Hela Provinsal Haus Sik i kirap na kamap namba foa haus sik insait long kantri long apim level bilong haus sik wok.

Mista Botten em i Siaman bilong OSF na Hela Provinsal Helt Atoriti.

Aninit long Pablik Praivet Patnasip, Mista Botten i strongim developmen wok na patnsaip namel long Oil Search na Gavman long kirapim Sir Manasupe Haus, Nesanel Futbol Stadium na Agiru Senta long Mendi.

Oil Search bai helpim gavman long kirapim APEC Haus we ol presiden na praim minista bilong ol APEC kantri bai kam yusim long taim bilong bikpela bung bilong APEC Lida long yia 2018.

# BSP helpim Klinim Pot Mosbi kempen



Riley Webster CEO bilong Sastenebel Koslain PNG (namel) i kisim piksa bilong K10,000 sekmani long bos meri bilong Maketing long dispela taim na Pablik Rilesens opisa, Rosemary Mawe.

**BENK Saut Pasifik (BSP) i gat bikpela tingting long strongim toktok bilong ne long 'Go Grin' long klinim siti na ol i givim K10,000 sponsaip bilong 'Klinim Mosbi Kempen'**

Dispela kempen em i Sastenebel Koalain PNG wantaim Nesenel Kepital Distrik (NCD) we i bn stat long 17 Oktoba na bai pinis long 13 Novemba 2016.

Kempen bai skulim ol sitisen na strongim ol lain i stap long Pot Mosbi long stretim pasin bilong tromoi pipia bilong ol.

Ryley Webster CEO bilong Sastenebel Koslain PNG i tok, "Wanpela mun bai mipela i wokim klinap wok long helpim ol NCD pipel

long kisim moa save long wanem kain hevi ol pipia we i no save sting long graun bai bagarapim ples na long lainim sampela gutpela wei bilong stretim dispela hevi."

Bos bilong Maketing long dispela taim na Pablik Rilesens opisa, Rosemary Mawe i tok olsem BSP i laik go het long helpim Euel Go Grin Klinap de bihain long Novemba.

BSP em i grin benk na mipela i amamas long wok patna wantaim Sastenebel Kostlain PNG husat i gat wankain tingting bilong stretim nambis bilong yumi na long kamapim gutpela na klin envairomen.

Aninit long dispela patnasip, Sastenebel Kostlain PNG i sapotim BSP Eco-

Ebeseda bilong mipela long ranim ol trening bilong wokim ol gutpela plen na wokim ol klinap.

Toktok bilong BSP Go Grin em isi tru; Reuse, Recycle and Respect. Ol narapela Go Grin wok bilong BSP em long; sapotim na promotim Earth Hour na Earth Day na long stap insait long Pot Mosbi Netsa Pak long makim Wol Envairomen De.

"Euel BSP Go Grin Klinap De we ol pipel wantaim wankain tingting husat i laikim ples bai no gat pipia, i klin na helti envairomen inap kam ples klia na wok wantaim long klinap, na long wankain taim autim toktok bilong senisim ol tingting," Rosemary i tok.

# Digicel skul i amamas long De bilong Wasim Han



Mutinneo CLC kamap wantaim wanpela pilai long taim bilong Digicel PNG Faundesen namba 8 eniveseri las wik. Foto: Digicel Faundesen

## Paul Zuvani i raitim

LAS wik Fonde Papua Niugini i amamas long Wol De bilong Wasim Han, na World Vision PNG wantaim Digicel PNG Faundesen i amamas long bungim ol skul pikinini bilong ol Komyuniti Lening Senta (CLC) bilong ol insait long Pot Mosbi na sampela Sentral Provins komyuniti.

Digicel PNG Faundesen i bungim ol sumatin bilong 11-pela pri skul na elementari skul insait long Mosbi yet na Sentral provins.

Dispela ol skul em O'Connor Komyuniti Lening Senta (CLC) long Gerehu, Clynn CLC (Morata Wildlife), Mokona CLC, Mercy Care CLC (Erima), Ripa (Morata), Gateway (7-Mile), Saraga (NCD), Mutinneo CLC na long Sentral em Rovarova CLC (Aroma), Sinagoro (Rigo), Gomore (Rigo), Pelaga (Aroma) na Gabagaba (Rigo).

mas long wokim ol pilai na kain kain so.

O'Connor CLC i kamapim diwai papet so we wanwan ol pikinini i soim na tokaut long wanwan hap bilong mango diwai na prut bilong em, na tokaut long gutpela bilong mango.

Ol narapela lain i soim banana na gutpela bilong em, kokonas na sampela moa ol diwai.

Ol skul i soim tu rot bilong wasim han na tokaut long gutpela bilong wasim han.

Ol i tok em i gutpela long wasim han bipo long wanpela i holim samting na putim long maus. Dispela i gutpela bikos em i ken mekim wanpela i stap klin na olsem doti i no ken go insait long bodi na mekim wanpela i sik.

Wantaim ol so na ol skul pikinini i long wan wan ol skul i soim save bilong ol long toktok long pablik, rit na rait.

Opisa, (CEO) Beatrice Mahuru i tok ol i amamas long luksave bilong dispela de wantaim ol skul pikinini.

Em i tok em i gutpela na i bikpela samting long ol pikinini i save taim ol i liklik yet long pasin bilong lukautim bodi bilong ol na stap helti.

"Mipela i lukim olsem wantaim ol komyuniti lening senta (CLC) mipela i sapotim ol mangi i lain gut," Mahuru i tok.

"Ol i ken lain gut na i ken lain hariap.

"Mipela i amamas long dispela kain senis i kamap long level bilong ol mangi long lain na dispela i kamap ples klia tu long ol so na pilai ol mangi i mekim long nau."

Long ol skul em i tok planti bilong ol tisa em ol voluntia tisa we ol i no gat pe bilong ol tasol i givim fri taim bilong ol long skulim ol mangi.

Bihain long de dispela ol skul i amamasim de wantaim gutpela tingting na save.

# Gavana Jeneral tok sori long Ami Opisa i dai

GAVANA Jeneral bilong Papua Niugin, Gren Sif Sir Michael Ogio i salim bikpela tok sori tu i go long family bilong ami opisa, Leptenen Kenel Matthew Kasap, long dai bilong em las wik.

Leptenen Kenel Kasap taim em i redi long kisim luksave bilong em long gavman long wok bilong em long helpim militeri taim em i bin pundaun long las wik Fonde.

Leptenen Kenel Kasap i bin pundaun long taim em i kamap tasol long Gavman Haus long kisim Medal bilong Militeri Sevis. Ol i karim em hariap tru i go long Pasifik Intenesenel Haus sik tasol em i dai pinis taim ol i kamap long haus sik.

"Mi bin sori tru long harim olsem wanpela gutpela militeri opisa Leptenen Kenel Mathew Kasap i dai. Em i winim dispela sevis awod bilong en long wok em i givim long PNG Difens Fos. Dai bilong em i soim olsem PNGDF na kantri i lusim

wanpela bikpela man bilong mekim wok.

Mi makim maus bilong meri bilong mi Ledi Esmie na Opis bilong Gavana Jeneral, na salim tok sori i go long ol famili, wantok na ol wanwok bilong Leptenen Kenel Mathew Kasap. Bikpela tok sori bilong mipela i kam long yupela na mipela i pre long bel isi bai stap wantaim yupela long dispela taim bilong wari," Gren Sif Sir Michael i tok.

Samting olsem 50 man-meri i bin kisim luksave bilong Oda bilong Papua Niugini (Logohu) medal long ol gutpela sevis long pablik na praivet sekta na tu long ol disiplineri fos na long wok bilong lotu.

Tude bai gat 2016 Kwin Bon De luksave seremoni long Gavman Haus. Olgeta lain husat i kisim luksave pinis na i no go long kisim medal bilong ol i mas go ring long opis bilong Gavana Jeneral long telepon 313 7000 o salim email i go long Nelly

Pouna long npouna@governmenthouse.gov.pg, na Maguli Bernard long mbgoffice@gmail.com



Ol lain i kisim Oda bilong Papua Niugini Logohu awod i sanap wantaim Gavana Jeneral Gren Sif, Sir Michael Ogio na Ledi Esmie Ogio bihain long ol i kisim medal bilong ol long Gavman Haus las wik.



Ol lain i kisim Oda bilong Papua Niugini Logohu awod i sanap wantaim Gavana Jeneral Gren Sif, Sir Michael Ogio na Ledi Esmie Ogio bihain long ol i kisim medal bilong ol long Gavman Haus las wik.

## Mannering bai no inap pilai long Foa Nesens



Simon Mannering i holim bal. Bai em i no inap pilai bilong ol Kiwi long Foa Nesens resis.

TOP ragbi lig pilai bilong ol Nu Silan Kiwi, Simon Mannering, bai no inap pilai long Foa Nesens resis long Inflan. Mannering i bin pilai 41 traime resis bilong Nu Silan, tasol em i no orait long liklik operesen long skru bilong em kwaik taim long resis bai stat. Simon em i bipo kepten bilong ol Kiwi i no bin pilai long las traime resis egensim ol Australia long Perth long

las wiken long givim em inap wik long skru bilong em bai orait. Tasol tim dokta, Greg Macleod, i tok em bai no inap long orait hariap. "Em i kirap na ran tasol skru bilong em i no redi long em bai pilai," Macleod i tok. "Mipela ol dokta bilong Nu Silan Warriors i save olsem Simon i ken redi long dispela resis, tasol em i no kamap olsem we em bai nidim

planti taim long orait." Foward bilong Penrith Panthers, James Fisher-Harris bai kisim ples bilong em long skwat, we asde ol i bin lainap long Oklan long go long Yunaitet Kingdom (UK). Kosa bilong ol Kiwi, David Kidwell, i tok, "Mipela i lusim Mannering em i bikipela lus, tasol mi amamas long Fisher-Harris i stap insait long tim."

## Burgess bai kamap kepten bilong Inflan

SAM Burgess bai kamap kepten bilong Inflan long Foa Nesens resis.

Ol i bin makim fowod bilong Saut Sydney Rabbitohs pas long James Graham wantaim Sean O'Loughlin bilong Wigan i bin kisim bagarap.

Burgess i stap wanpela yia long ragbi yunion bipo long em i go long ragbi lig.

Inflan bai pilai egensim ol Nu Silan long taim bilong opim Foa Nesens gem long Oktoba 29.

"Ol i makim mi kepten em i driman bilong mi taim mi liklik boi," Burgess i tok.

"Mama bilong mi na meri bilong mi i amamas taim mi tokim tupela."

Inflan i no save win long Foa Nesens resis we long dispela yia em ol bai pilai wantaim Australia, Nu Silan na Skotland.

"Mipela i save long dis-



Sam Burgess i amamas long ol i makim em long kamap kepten bilong ol Inflan long Foa Nesens resis.

pela stori olsem ol i no bin win, nogat. Tasol, nau em i taim bilong mipela long traime na mekim dispela wok," Burgess i tok.

"Mi bai kamap kepten long pilai graun long dispela tonamen, tasol i gat sampela lida tu i stap long skwat na mi save olsem dispela bai

wok orait we mipela bai mekim gut." Bihain long ol bai bungim Nu Silan long Huddersfield, ol bai pilai egensim ol Skotland long Coventry long Novemba 5 na bai bungim ol Australia long Olimpik Stadium, London, long Novemba 13.

## Kyrgios bai no inap pilai tenis



Nick Kyrgios bai no inap pilai insait long 8-pela wik.

ATP WOL Tua i stopim Nick Kyrgios long pilai tenis insait long 8-pela wik bihain long eksen bilong em i kamap karanki long Shanghai Masters.

ATP i tok olsem, namba wan pilai bilong Australia i brukim bikipela lo bilong gem.

Teni Australi i sapatim Kyrgios na i tok, ol Australia i tok orait long kisim wan-

pela profesenel skul toktok na em bai winim mak long go bek long Novemba 7. Long dispela taim, Nick bai no gat inap sans long kwalifai long ATP Wol Tua fainal.

Kyrgios i tok orait long ol i stopim em, na em i tok olsem em bai kam bek strong long 2017.

"Mi bihainim disisen bilong ATP na kisim dispela

taim long tok sori gen ol samting i kamap long Shanghai," Kyrgios i tok.

"Sisen i kamap strong na mi bin pait egensim planti salens i go inap long pinis bilong sama. Mi tok sori long ol sapota long Shanghai na olgeta hap long wol. Na mi tok tenkyu long ol ogenaisa long Shanghai long gutpela wok bilong ol."

## Pakistan i daunim ol Wes Indies long kriket resis



Darren Bravo i kisim 116 insait long 56 ran i daunim ol Wes Indies long traime resis.

PAKISTAN i win wantaim 56 ran egensim Wes Indies long de-nait traime resis long Dubai.

Mohammad Amir i kisim

3-63 bilong ol asples long namba 400 traime resis bilong ol.

Ol Pakistan i kisim tripela las wicket long kamap wina

wantaim 12 ova.

Ol i statim fainal de wantaim 95-2 na em i namba wan traime win insait long 12 resis.

## Liverpool na Manchester Yunaitet i dro

MANCHESTER Yunaitet i pilai strong long kamap namba 5 premia lig wina, tasol namba wan kala bilong Jose Mourinho i strongim banis bilong ol Liverpool na ol i dro wantaim 0-0.

Na tu, ol Yunaitet i no larim ol Liverpool long kisim wanpela skoa na strongim banis bilong ol tu.

Golkipa bilong ol Yunaitet, David de Gea, i stopim tupela sev we Emre Can na Philippe Coutinho i traime long kisim skoa.

Long namba tu hap bilong resis, ol Yunaitet i gat gutpela sans i stap we Paul Pogba i makim stret long kisim wanpela gol, tasol Zlatan Ibrahimovic i pasim wei bilong en.

Jurgen Klopp i kam long fainel minit long mekim ol sapota bilong Liverpool i singaut, tasol em i asua liklik we em i no kisim wanpela gol.

Tupela tim wantaim i strongim banis bilong ol na ol i no kisim wanpela poin.



Kipa bilong Manchester Yunaitet, David Gea, i sevim wanpela sot bilong Philippe Coutinho.



Bikpela bagarap stret i bin kamap long Mingming fut-bris na ol manmeri yusim mambu long wokabaut.

# Ramu NiCo stretim bagarap long Mingming fut-bris

RAMU NiCo Menesmen (MCC) i soim gen pasin bilong helpim komyuniti klostu long en taim em i helpim long stretim bagarap we i bin kamap long Mingming futbris klostu long Raikos haikul.

Dispela bagarap i bin kamap bihain long bikpela tait-wara i bagarapim tru ples bilong ol manmeri na pikinini i wokabaut i go kam antap long dispela waia fut-bris. Dispela fut-bris em bipo nesenel palamen memba bilong Madang rijinal, Sir Peter Barter i bin

kamapim long helpim ol lokal pipel long muv i go kam long kisim sevis long Raikos haikul.

Long yia 2012 bikpela tait-wara bilong Gawar riva i bin bagarapim stret fut-bris na na rausim ol waia na samt- ing long bris. Bihain long dispela hevi i bin kamap ol komyuniti i nidim stret helpim na raitim pas i go long Ramu NiCo (MCC) na long dispela taim ol wokman i bin go stretim na senisim ol samt- ing long bris.

Tasol long dispela yia gen, narapela bikpela tait wara i kamap na i bagarapim stret bris bilong wokabaut. Turangu ol skul pikinini na ol bikpela manmeri i save pret tru taim ol i wokabaut i go kam bikos bihain long bagarap i bin kamap ol lokal pipel i yusim mambu em ol i

putim antap long bris na save wokabaut. Tasol dispela i no seif.

Olsem na long las wik antap long Oktoba 14, ol wokman bilong Ramu NiCo long Basamuk Komyuniti Afes (CA) Dipatmen i bin go long Mingming na mekim ripot, na salim long menesmen bilong Rifaineri, na tok-orait kamap olsem wok bilong stretim bris mas kamap.

CA Dipatmen Suprintenden long Basamuk Rifaineri, Andy Hu i tok olsem stat long Oktoba 14 ol wok lain bilong BSK Fiks Mentenens Dipatmen i bin go long Mingming na wok hat stret long weldim ol faundesen bilong fut-bris na putim ol strongpela ain we ol manmeri i ken yusim long wokabaut. Ol i weldim tu o lain long strongim bris na taitim ol

sait sait bilong bris wantaim waia long mekim i seif long ol manmeri i ken yusim.

Mista Hu i tok ol Ramu NiCo lain i yusim ol welding masin na ol arapela masin long mekim ol bikpela wok tasol. Ol arapela wok long taitim waia long sait bilong bris na antap em ol givim wok long ol lokal lain long mekim. Dispela em pasin bilong serim wok bikos ol lokal pipel i ken save long pasin bilong lukautim bris na wokim meintenens tu taim bris i bagarap.

Ramu NiCo i soim olsem em kampani we i stap long helpim komyuniti em i wok klostu long en long taim hevi i bungim komyuniti. Dispela ol helpim i go wantaim het- tok Kampani i sanap long en em "Wanpela Ramu NiCo, Wanpela Komyuniti"




Ol Ramu NiCo Fixed Mentenens wokman stretim faundesen bilong bris.



Ol wokman weldim ples bilong wokabaut.



Ramu NiCo CA wok lain em Hans Gizdamon, Tony Gaiyu na Nicholas Genaia i sanap wantaim ol pikinini bilong ples Mingming arere long futbris.





# Nupela Twlait Basketball program i op

**BASKETBALL Federesen bilong Papua Niugini (BFPNG) i tokaut long nupela Twlait Basketball program long wik i go long Taurama Akwatikna Indo Senta long long Pot Mosbi.**

Twlait Basketball em i nupela Hup bilong Helt projek we ol i bin givim aninit long komyuniti egesmen plen bilong nesanel federesen.

Eksekutiv opisa bilong BFPNG, Joel Khalu, i tok program em i strongpela rot bilong

ol pipel long pilai spot.

"Ol i bin kamapim Twlait program long bungim ol yanpela PNG lain bilong yumi na putim ol long wanpela gutpela envairomen aninit long ol bai resis strong long basketbal.

"Long pilai ol gem long wan wan sisen, yumi bai promotim gutpela sait bilong kamapim helti laifstail, skulim ol lain bai resis long ol kaikai na ekasesais.

"Yumi bai toktok tu long gutpela na velu bilong edukesen

na strongim ol pikinini long go long skul.

"Twlait Basketball bai givim sans long ol lain bai resis long givim Fraide apinun taim bilong ol long gutpela envairomen long soim fan, frensip na fitnes," Khalu i tok.

Khalu i tok, dispela program i kamap isi aninit long sapot bilong Federesen bilong Intenesenel Basketball (FIBA) na fanding i kam long Pasifik Spot Patnasip program bilong Australian Gavman.

Em i tok moa olsem, program em i op na fri long ol lain aninit long olgeta krismas.

"Federesen i gat bikpela bilip long we Twlait Basketball program bai bringim pis na kraitim level bai go daun na ol gutpela samting bai kamap long komyuniti.

"Daunim kraitim em i bikpela hap bilong dispela program na long pinis bilong dispela program, yumi bai lukim i no gat wanpela asua bai kamap long ol Fraide apinun," Khalu i tok.



Nupela Futbol Opisa bilong ol meri long FIFA, Sarai Bareman. Piksa; OFC.

## FIFA i makim Futbol Opisa bilong ol meri

FIFA i amamas long tokaut long olsem ol i makim Sarai Bareman long kamap Futbol Opisa bilong ol meri.

Bareman bilong Nu Silan bai wok aninit long Futbol Divisen bilong ol meri, na ripot i go stret long Deputi Seketeri bilong FIFA, Zvonimir Boban, na em bai stap tu long FIFA Menesmen Bod. Em bai stat wok long nupela wok bilong em long Novemba 14.

Ol i sanap long plen bilong

FIFA long sapot na promotim moa long ol developmen bilong futbol bilong ol meri, na Sarai i bringim bekgraun bilong fainens na futbol edministresen aninit long wok bilong Futbol Opisa bilong ol meri.

Na tu em bai wok aninit long dispela wok longpela taim we em i oraitim bel angre bilong gem.

Em i bin stat pilai taim em i liklik meri yet. Papa na kosa bilong em i strongim em long

pilai na em i pilai i go het long top level bilong gem taim em i makim nesanel futbol tim bilong ol meri Samoa.

Sarai i wok long nesanel asosiesen level olsem CEO bilong Samoa Futbol Asosiesen, we em i lukautim fainensel menesmen na mekim ol nupela plen. Bi-hain em i kisim wanpela wok long konfederesen level na stat wok olsem Opreesen Menesa long Osenia

Futbol Konfederesen (OFC), bipo long ol i promotim em long kamap Deputi Seketeri Jenerel bilong OFC.

Sarai i wanpela meri tasol i save memba long 2016 Rifom Komiti bilong FIFA, na planti senis i kamap long Ogenaisesen bikos em i strongim lidasip long ples bilong ol meri long FIFA. Dispela i kamap strong long bung bilong FIFA long Februari 2016.

## Lelai i stap long MEMOS trening na kam bek

SIAPESEN bilong Papua Niugini Etletik Komisn, Karo Lelai, i statim trening bilong em long Eksekutiv Mastas long Spot Ogenaisesen Menesmen o MEMOS (Masta Eksekutiv en Menesmen des Ogenaisesen Sapotiv) long Lausanne, Switzerland, na i kam bek.

MEMOS stadi program em insait long 12 mun we ol i save stadi aninit long 4-pela hap insait long wanpela yia na Lelai i pinisim namba wan program i bin kamap long Septemba 11 i go inap long 20.

Namba tu hap bai kamap long Botswana, namba tri hap bai kamap long Netherlands na na namba foa hap bai kamap gen long Lausanne.

Lelai i tok, dispela program em i wanpela bikpela luksave long wok wantaim ol narapela profesenel na skelim ol tingting na save long helpim wanpela na narapela.

"Mi amamas long dispela sans long skelim ol tingting

wantaim ol lain i kam long ol narapela kantri na luksave olsem yumi gat narapela kain rot long stretim wankain hevi.

"Na tu, em i bikpela samting long lukim nupela kantri na lainim ol nupela pasin bilong ol pipel na kalsa bilong ol," Lelai i tok.

Dispela wokabaut bilong Lelai em i go aninit long sapot bilong Intenesenel Olimpik Komiti skolasip aninit long Olimpik Solidariti na Papua Niugini Olimpik Komiti.

Em i namba foa lain long PNG long kisim MEMOS program bihain long Auvita Rapilla, Andrew Lepani na Alex Davani.

Seketeri Jenerel bilong PNGOC, Auvita Rapilla, i amamas na tok tenkyu long ol i makim em long MEMOS na i tok, "Developim tingting bilong Nesanel Federesen bilong yumi na ol wan wan lain husat i wok aninit long spotting bodi bilong yumi em



Karo Lelai wantaim ol lain husat i kisim wankain program long Lausanne, Switzerland.

i namba wan eria PNGOC i save lukluk long en.

"Yumi tu i amamas long lukim Karo i lukluk long projek bilong em long wanpela namba wan eria bilong spot long PNG, na mipela bai wok klostu wantaim em long pinisim projek bilong em na redim sampela sans bilong em long soim save bilong em we em bai kisim long MEMOS."

Pepa bilong Lelai long Gud

Gavonens em ol bai givim long Lausanne long taim bilong fainal hap bilong program.

Ol lain husat i kam long olgeta hap long wol long stap wantaim long dispela program em Nesanel Olimpik Komiti bilong ol i makim ol long salim pepa i go long MEMOS program bihain long ol salim ol aplikesen wantaim proposal bilong projek bilong ol.

## POM Snuka salens nominesen i op

NOMINESEN bilong 2016 MMI Pot Mosbi Snuka salens i op.

Presiden bilong Pot Mosbi Biliad na Snuka Asosiesen, John Chan, i tok fi bilong nominesen em i K200 na ol i piutim K50 diskaun sapos ol i baim bipo long pinis taim long 8 klok apinun long Oktoba 24.

"Ol bai luksave kwaiktam long ol lain husat i kam pas. Mipela i lukluk long kisim 64 man na meri pilaia wantaim long resis," Chan i tok.

Presiden i tok moa olsem, ol bai bung long tok-save long dispela long Lamana Q Klap long 5 klok apinun long Oktoba 26 bilong ol bai statim resis long Oktoba 27.

"Ol nominesen fom i redi stap long Aviat Klap na Lamana Q Klap," Chan i tok.

Ol fainal bai kamap long Sande, Novemba 6, long Lamana Q Klap.

Dairekta bilong tonamen em Danny Earls we Gamu Miria, Ida Keni na Malcolm Currie bai helpim em long ol wok.

Chan i tok tenkyu long Pasifik MMI long ol i go het na sapot long ol.

"Sponsasip bilong ol wan wan grup i op yet na ol kopret kampani husat i laik sapotim dispela resis em ol i ken ringim mi long fon namba, 72203837, o i ken ringim vais presiden, Stewart Nikints long namba, 76719529," Chan i tok.

**Pilaia bilong Digicel long Bowl divisen i laik brukim banis egensim ol Bishop Brothers, tasol ol i redi long takelim em. Digicel i win wantaim wanpela trai, 6-0.**



## Kopret 9s resis i pinis

FAINAL bilong olgeta 4-pela divisen bilong 2016 Kopret 9s Ragbi Lig resis i kam long mak long las wiken wantaim ol gren fainal i bin kamap long Nesanel futbol stadiam.

Tim Sentral Provinsal Gavman i winim Kap bihain long ol i bin daunim ol GFI, 20-14, long gren fainal.

Ol boi long Sentral i winim K4,000 prais mani taim ol GFI wokabaut wantaim K2,500 olsem ol i rana ap o kamap namba tu long Kap divisen.

Ol Spidertek i apim plet bihain long ol i bin daunim PWC, 12-6. Ol i kisim K2,000 na ol namba tu ples, PWC, i kisim K1,500.

Long Bowl divisen, ol Digicel i rausim ol Bishop Brothers wantaim wanpela trai na kik, 6-0. Ol Digicel i kisim K750 na ol Brothers i kisim K500 long kamap namba tu.

Dipatmen bilong Fainens i daunim ol AES, 14-6, long Penent divisen na kisim K450, na ol AES i kisim K300.

# Klostu long 200 polis meri bai kamap FIFA sekyuriti

**OL i bin makim klostu long 200 polis meri long kamap sekyuriti long taim bilong FIFA Anda 20 Wol Kap resis bilong ol meri long Pot Mosbi.**

Ol i bin bung long tripela de woksop long i bin stat long Mande long Lamana Hotel i makim 51 polis meri olsem Tim Sekyuriti Liaison Opisa (TSLO) bilong ol 16 tim bai resis na 130 meri polis opisa long ol narapela senta bai kam long Pot Mosbi long statim sekyuriti operesen long pinis bilong dispela mun.

Ol i bin makim 4-pela meri opisa pinis long kamap komanda bilong ol hap bilong resis na bai stap long ol pilai graun.

Sekyuriti Menesa bilong Lokal Ogenaising Komiti (LOC), Hatahu Lohia, i tok woksop

em i bilong tok klia long ol meri wantaim ol wok bilong ol long taim bilong tonamen.

Wankain olsem long Tri-Nesens tonamen, wan wan tim em ol bai makim tu o tri TSLO na wangepela TLO, husat bai stap wantaim long ol tim long taim bilong tonamen.

Polis Komisina, Gari Baki, i opim woksop na i tok tenkyu long ol opisa husat ol i bin makim long kamap TSLO, na i tok, bikpela sekyuriti bilong FIFA Anda 20 Wol Kap resis bilong ol meri i stap long han bilong ol meri long Royal Papua Niugini Konstabuleri (RPNGC).

“Ol i bin givim mi wok we mi laikim ol polis meri long go pas long dispela tonamen na long dispela astingting, mipela i makim bikpela namba bilong ol polisman,”

Baki i tok.

Komisina Baki i strongim ol meri opisa long makim PNG na RPNGC wantaim bikos dispela em i namba wan taim we PNG i go pas long intenesenel futbol.

“Ol salens bai opim ai bilong yumi olgeta bikos dispela em i namba wan iven we em bai putim mipela aninit long bikpela presa na tu, mipela bai redi long go pas long ol intenesenel iven long bihain taim.

“Wanem samting yupela mekim nau bai soim mipela i redi gut long APEC miting o nogat, bikos yumi bai yusim dispela ekspiriens mipela bai kisim aninit long FIFA Anda 20 Wol Kap resis bilong ol meri long helpim mipela long mekim plen bilong APEC,” Baki i tok.

# Lae Ragbi Lig i go long fainel

LEA ragbi lig i go long fainel resis bilong en stat long las wiken.

Taim planti ol senta hap bilong kantri i pinisim sisen bilong ol, Lae lig em i wangepela bilong ol premia lig long kantri i go insait long fainel.

Taim fainel resis i stat, ol Lae Bisket Spider i bin daunim ol MorobeTigers, 10-0,

long semi fainel na Lae Panther i rausim Toner na Ink Royals wantaim 4-pela poin, 20-16.

Ol Royal i rausim su bilong ol na i malolo long resis long narapela sisen na ol Panther bai bungim ol Tiger long bikpela semi fainel bai kamap long dispela wiken.

Wina bai go het na

bungim ol Spider long 2016 gran fainel.

Long resis bilong ol Anda 20 em ol Warrior i stap sam-bai long gren fainel resis bai kamap neks wiken.

Ol Spider na Tiger bai pilai bikpela semi fainel long dispela wiken na wina bai bungim ol Warrior long gran fainel.



Ol Lae Panther na Ink Royals i resis long meja semi fainal.

# Tonga i wetim helpim bilong PNG yet

TONGA i wetim helpim bilong Papua Niugini yet long kirapim Teufaiva Stediam.

Ol ogenaisa bilong 2019 Pasifik Gems long Tonga i tok, Papua Niugini bai bihainim tok promis bilong em long helpim ol long kirapim Teufaiva Nesenel Stediam.

RNZ i ripot olsem PNG i tok orait long helpim ol bihain long Praim Minista bilong Tonga, Akilisi Pohiva, wantaim sampela ol wan pati bilong em i bin kam long Pot Mosbi long Janueri.

Bihain, Spot Minista bilong Papua Niugini, Justin Tkatchenko, i bin kisim sampela lain i go long Nuku'alofa long lukim ol lokal spot feseliti.

Tasol, CEO bilong Gems Ogenaising Komiti (GOC), Lord Sevele, i tok, ol bai wok insait long 8-pela mun em i no stat yet na ol i no save long wanem taim

dispela wok bai stat.

“Ol Gavman opisal i no tokaut yet long hamas mani ol bai givim long mekim dispela wok na tu, ol i no tokaut yet long wanem taim ol bai statim wok,” Sevele i tok.

“Ol i bin tokim mipela olsem PNG bai kam insait long helpim mipela, tasol mipela i no lukim wangepela samting long strongim dispela yet.

“Mipela i olsem kantri bilong yumi yet, mipela i bin tokim Praim Minista olsem dispela em i wok bilong mipela long kamapim gen Teufaiva nesenel stediam we mipela i gat long en.

“Mipela i plen olsem yumi bai kisim sampela mani na Australia na Nu Silan i givim sampela mani na mipela i kamapim dispela stediam bikos em i no bikpela mani. Yumi i ken redi long putim han bilong mipela i go insait long

poket long kirapim dispela stediam,” Sevele i tok.

Sevele i tok, “Mipela i gat plen pinis na sapos mipela i mekim olsem em mipela i ken stat kamapim Teufaiva long mun Mas bilong dispela yia. Minista bilong Fainens i bin tokim mipela pinis olsem ol mani i stap.

“Mipela i makim taim long pinisim Teufaiva long mun Mas bilong yia i kam na Wales ragbi tim resis i ken kamap olsem mipela askim long en. Tasol nau, dispela bai no inap long kamap,” Sevele i tok.

Em i tok, “Ol politik man i ken stap olsem politik man na mekim wok bilong ol, na wok bilong gavman em i bilong redim mani na na larim mipela long go het na wok.”

# Namibia i pilai egensim ol Barramundi

BIKPELA wok i stap long han bilong ol Namibia bihain long 4-pela de ICC Intakontinentel Kap long Amini Pak long Pot Mosbi.

Ol Namibia i painim hat taim long ol resis ol i bin pilai klostu taim wantaim asples gem we ol i lus egensim Saudi Arabia long wangepela intenesenel poro resis long las mun. Bihain ol i bin pilai wantaim Westen Provins we Namibia i lus gen long Kriket Saut Afrika resis long las wiken.

Ol ekspiriens pilaia bilong ol olsem Gerrie Snyman, Nicolaas Scholtz, Craig Williams na Sarel Burger i bin pilai gut long ol dispela resis i bin kamap klostu taim, tasol ol yangpela pilaia olsem Zhivago Groenewaldt, JP Kotze, JJ Smit na Zane Green bai pilai egensim ol Hebou PNG Barramundis husat i kam long bikpela rot bilong Saut Australian Kriket Asosiesen (SACA).

Operesen Menesa bilong Kriket PNG, Gayan Loku, i tok, ol Barramundi i bin mekim bikpela wok redi long stat i go inap long taim bilong resis egensim ol Namibia.

“Ol boi i lus long wangepela resis egensim Tasmania long Saut Australian Kriket Asosiesen lig, tasol ol i mekim gut long ol narapela resis long taim ol i mekim wok redi long dispela resis,” Loku i tok.

Namibia bai pilai tupela resis egensim PNG long Wol Kriket Lig Sempionsip (WCLC) resis we nau ol Namibia i painim hat yet na nau ol i stap long namba tu las ples wantaim tupela poin wantaim wangepela win tasol long ol 6-pela resis.

Ol Hebou PNG Barramundi i stap namba foa ples long ol 8-pela tim wantaim 8-pela poin we ol i win long 4-pela resis na lus long tupela resis.

PNG i bin daunim Nepal tupela taim na Kenya tupela taim, tasol ol i lus long tupela gem egensim ol Netherland.

Ol Netherland i stap namba wan ples wantaim 12 poin, Skotland i stap namba tu ples wantaim 11 poin na Hong Kong i stap namba tri ples wantaim 9 poin.

Em i namba wan taim bilong Kriket PNG long go pas long ICUP long Papua Niugini na em i namba tu taim we WCLC resis i kamap long PNG bihain long ol Hebou PNG Barramundi i daunim Kenya, 2-0, long mun Me.

“Kriket PNG (CPNG) i amamas long go pas long dispela resis na ol bai no sasim get fi we mipela i laikim olgeta lain long kam long Amini Pak na lukim ol bikpela kriket pilai bilong ol bikpela kriket pilaia bilong PNG,” Gayan i tok.



Spot Minista bilong Papua Niugini, Justin Tkatchenko, wantaim Praim Minista bilong Tonga, Akilisi Pohiva, i sanap long namel long taim Minista Tkatchenko i bin go long Nuku'alofa long Februeri. Facebook: Justin Tkatchenko MP

# Barakau Ragbi 9s go insait long Fainel



Pilaia bilong KBK i traim long pasim bal taim ol pilaia bilong Crusaders i bungim em long fainel pilai bilong ol long Barakau Ox& Palm pilai graun.



Pilaia bilong Birds i ran long ol pilaia bilong Sanders. Birds i win na bai go long semi fainel long dispela wiken.



Pilaia bilong Birds i rausim bal taim em bungim difens bilong Sanders.



Ol Pompom meri husat save mekim paia long pilai graun taim ol tim i ran go insait long pilai graun na tu taim ol i pilai.

### Nicky Bernard i raitim

**BARAKAU** ragbi bai go insait long fainel long dispela wiken Sarere long lukim husat bai kam sempion tim bilong 2016.

Long las wiken, ol i pilaim nokaut bilong ol na 4-pela

tim tasol i stap long resis long lukim husat tru bai kamap sempion bilong dispela yia.

Ol opisal na refri bilong Pot Mosbi ragbi lig i bin go long Barakau long lukautim dispela nokaut pilai namel long 6-pela tim.

Planti bilong ol dispela tim

i gat wankain skoa long poin tebol nao i pilai strong tu long stap insait long top foa.

Dispela wiken bai lukim ol 4-pela tim i pilai long ol yet na bihain, lukim husat tupela tim bai go insait long gren fainel bilong dispela yia.

Barakau Ragbi 9s bai traim strong tu long rejista aninit long Sentral Ragbi lig bod na bai traim long resis long pilai Sentral Kap sapos em i go insait.

Nau yet, Barakau Ragbi Lig i stap aninit olsem komyuniti pilai ol save mekim long olgeta yia.

Liklik komyuniti long Barakau ples insait long Sentrel Provins i save kam laip long olgeta Sarere taim dispel liklik komyuniti ragbi save kamap.

Planti ol yanpela mangi i save pilai long mekim ol bisi long lusim ol narapela samt-ing we save bagarapim komyuniti bilong ol.

Dispela wiken bai lukim dispela liklik ples paia lait taim dispela fainel bilong ragbi bai kamap.



Tim Panthers em wanpela bilong ol tim bai go insait long semi fainel bilong Barakau Ragbi 9s.



WHITE TUNA FLAKES  
**DIANA White**

WHITE TUNA  
insait  
**K 2.20**



Manufactured by:  
RD Tuna Cannery Ltd.



*Tasty and Flavourful White Tuna for Everyone!*

# Ol Barramundi bai go long Honk Kong



Ol Hebou PNG Barramundi bai go resis egensim ol Hong Kong long Novemba 4 i go inap long Novemba 8.

**PAPUA Niugini Barramundi bai go long Hong Kong long stat bilong mun i kam long pilai long tri-gem ODI bihain long resis egensim Namibia i pinis.**

Dispela pilai em i hap bilong raun robin lig resis namel long ol 8-pela tim em Ireland, Afghanistan, Skotlan, Yunaitet Arab Emirets, Hong Kong, Papua Niugini, Netherlands na Namibia.

Olgeta tim i resis long go insait long ICC Kriket Wol Kap Kwalifaia 2018 na bihain ol bai kwalifai long ICC Kriket Wol Kap 2019 resis long Ingran na Wales.

Hong Kong i bin makim ol skwat bilong em long Mande long pilai egensim ol Papua Niugini Hebou Barramundi na ol Barra i lukluk long kamap wantaim wankain tim husat i pilai egensim Namibia.

Long wankain resis ol i bin pilai long Australia long 2014 em i namba

wan resis we ol Papua Niugini i bin pilai inap long ol i bin kisim ODI status long Intenesenel Kriket Kaunsil. Long dispela resis em ol i bin daunim ol Honk Kong, 2-0.

Tasol nau, Honk Kong i gat sans long go pas long raun robin ODI kwalifaia resis egensim Papua Niugini. Resis bai kamap long Novemba 4 i go inap long Novemba 8 long Tin Kwong Rot Rikriesen Graun.

Long wankain taim, de tri resis i stat long Tunde moning long Aminin Pak long Pot Mosbi em ol Hebou PNG Barramundi i no amamas we ol Namibia i win.

Tony Ura na Vani Vagi Morea i pilai gut na skruim poin bilong ol Barramundi, tasol Namibia i strongim banis bilong ol gen na stap pas gen long ol PNG na i win.

Ol i gat wanpela moa resis i stap yet long pilai.



Available as:  
Delivery van  
15 seater  
16 seater

Ready to power up your business ?  
The all-new NV350 Urvan delivers with style.

- Powerful 95kw diesel engine
- Folding aisle seats
- Large sliding door
- CD player
- Full air conditioning
- Stylish slide window



Photo for illustration purpose only

